

曲園叢書

14
484
46



門 4
號 484
卷 46



春在堂雜文續編三

德清俞樾

枝山文集序

往年吳中重修唐六如居士桃花仙館而以祝京兆文待詔兩公附祀余爲題四絕句其一云重將祠墓訪圖經三百年來夢墨亭仙館桃花還似舊草堂何處問懷星蓋深惜京兆之流風餘韻不可復見也越三載而京兆之族裔籽庵大令以枝山文集殘本四卷見示乃明嘉靖中謝君雍所手錄以贈文衡山先生者謝君字元和集中有贈謝元和序盛稱其能子能友而期以德業

大成者卽其人也寫此時年已八十一歲筆墨黯淡編次不苟洵舊帙之幸存者籽庵因錄副本付之剞劂而問序於余余惟京兆與六如居士齊名六如以畫傳京兆以書傳然六如詩文率易頽唐不稱其畫而京兆之文則冥冥獨造猶有古作者遺意詩詞亦清麗可誦在明代詩文中不依傍門戶而自成一家視六如居士殆有過之 四庫全書收懷星堂集三十卷今此本止四卷非其全者故止云殘本然記傳雜說詩詞無所不備讀此亦可見懷星堂集之大概矣謝君以通家子弟垂暮之年手錄其文籽庵以三百年後裔孫重刻以行世

是皆可風也海內外好書士不能盡見懷星堂全集而

獲觀是編則京兆之流風餘韻庶幾其不泯矣

蘆槎詩稿序

近時曾沅浦中丞刻王船山先生遺書以勝國遺老之書閱二百餘年而大顯於世士林詫歎以爲奇觀然船山先生之書王氏世守之未嘗失墜且其諸經碑疏四庫全書久已著錄則其書固不甚晦也若蘆槎逸士亦勝國遺老其所撰述雖不及船山之富然其自爲小傳稱於兵農錢穀禮樂刑名厯算漕河水利茶馬諸政皆有著撰而二十一世孫凌颿臚舉其自至二十三種

凡一百五十二卷則亦不爲少矣乃問之世世無知者問其家家無藏者獨此古今體詩五百餘首其裔孫名書賢者同治庚午歲於他所得之初猶不知爲誰何之作因詩中事實與其家譜所載逸士合而未卷有聯句詩自署其名卽逸士名也乃大驚喜編次寫定將以壽諸剞劂而問序於余嗟乎事之顯晦洵有時哉此一編也雖不及船山全書之十一然沉玉淪珠不致泯沒則亦幸矣逸士姓沈氏名潛字乾初甯波慈溪人明諸生人本朝抗志不仕以明經終蘆槎逸士蓋其自號云逸士所著書有四書五經尊王錄二十卷尊聖錄六

卷九經開卷大義一卷御覽五經大義五卷五經詳節十四卷諸史人物第一四卷諸史詳節十卷名臣錄四卷歷朝政務六卷大學衍義參略八卷私議官制一卷蘆槎文集廿卷其外制義試牘詩選文選尙甚衆

馬氏清芬集序

陳思王有言家有千里騏驎勿貴是以世擅著述昔人所難一門之中人人有集史氏以爲美談宋劉元高編三劉家集祖孫父子詩各一卷明代有長洲文氏五家詩亦祖孫父子也煥往輝來士林美之南海馮氏爲嶺

南巨族余與竹儒觀察交觀察大父子皐先生以翰林作令山左而其舉於鄉也實與先君子爲同歲生辱有通家之誼因得悉其家世承以叔祖子良先生詩錄見示并以贈公尹平刺史畫卷屬題駿烈清芬亦粗見大略矣今年春余來滬上又出示馮氏清芬集三卷蓋皆子良先生所編輯者其曰水豹堂詩選則觀察六世祖南浦先生詩也曰白蘭堂詩選則其高祖石門先生詩也其曰拙園詩選則子皐先生詩也詩雖不多而琢磨風雅陶寫性情讀其詩皆可想見其爲人水豹堂詩有詠白牡丹詩十首其發端云清如冰雪淡如雲富貴叢

中只見君胡君承謨作序稱其超然於富貴之外至石門先生遂以白蘭名堂亦可見其清白相傳家風勿替矣子皐先生以玉堂中人出爲循吏未竟所施於濟南城外買荒園一區襍蒔花木小有泉石是名拙園與賓朋觴詠其中不以升沉爲念識者謂清白吏子孫天固宜昌大其家而尹平刺史又坐事戍塞外沒齒不歸鬱久而發將於觀之徵之觀察負幹濟才長於議論文學政事兼而有之又嘗於席間見觀察公子美秀而文蘭茁其芽杜少陵云詩是吾家事韓昌黎云固宜長有人文章紹編剡觀於馮氏其勿信矣乎世德之芬相承未

艾此一編以清芬名臨風三嗅久而彌芳亦如蘭之爲
香祖矣豈止若黃庶伐檀集僅附山谷集後哉

石琢堂先生竹堂文類序

琢堂先生爲余六十年前同館前輩蓋先生乃乾隆庚
戌廷試第一人而余亦以道光庚戌入詞館後先相
距適甲子一周也咸豐中余自河南罷歸故里無家僑
寓吳下卽居先生獨學廬中所謂城南老屋者是也其
中微波之榭眠雲之舍猶尙無恙園中五柳存者三焉
余徘徊其間不勝景仰之意而先生之遺書顧未得一
讀蓋其時鏤版已殘缺過半矣俄而大亂踣至倉皇出

走亂定復歸則城南老屋化爲邱墟再過經史之卷兔
葵燕麥搖蕩春風而已乃有先生之孫曰鼎清子和者
過余春在草堂手巨編見示則先生全集也凡爲文者
八卷爲詩者十有六卷余讀而歎曰我朝乾嘉之間
氣運隆盛文物休明士大夫遭際盛時享升平之福故
發爲文章有俯仰揖讓之態無志微噍殺之音蓋亦時
使然哉先生根柢深厚議論名通讀其與姜中丞三書
及上成邸書又代擬河道及海運各奏議老成深識
通達治體非徒以文字見長詩亦風格道上有盛唐人
遺音自道光中棄至咸豐之季海內多故運會少衰詩

文體格亦流於骫骳數十年中未見有與抗行者烏乎
讀先生之文亦可以觀時矣夫故家喬木古人所重凡
伯家父皆大雅舊人春秋貴之方今大難削平剝極而
復世運與文運皆將起而紹乾嘉之舊則先生之集固
宜播之士林以爲模楷不可聽其銷歇於哀朽蟬斷之
中也原版因寇亂全燬子和以世家子抱守遺書不敢
失隊昌黎云文章紹編剗庶幾不媿然亂離之後以筆
耕自食剗削之資未能任也吳下士大夫多憙文章重
道義必有能任其事者和其謹待之惟余忝與先生
先後六十年同爲庚戌翰林又嘗厲先生獨學之廬而

世事變遷恍如一夢烏衣門巷不可復識讀集中城南
老屋記不勝今昔之感矣

蓮溪文集序

古無所謂文集也集者其身後子若孫與夫門生故吏
裒集其所爲詩文以行於世於是乎有集之名今所傳
漢人文集若蔡中郎集孔北海集皆卷帙不多非如後
人文集動輒數十卷也然其根柢深厚故其光油然而
幽其味黯然而長雖或寥寥數篇而使人尋繹不能竟
烏乎此所謂古人之文歟秀水沈蓮溪先生自幼有神
童之目博涉羣書尤邃於三禮中年後數歷中外政績

爛然而仍不廢學其著述已刊者詩集八卷續集三卷
懷小編二十卷以及時文試帖各如千卷而古文固未
出也光緒二年距先生之歿十有九年其嗣君書森太
守乃編纂其遺稿得三十餘篇次第爲二卷刻以行世
蓋文之可傳者固不在多也余讀先生時文試帖皆粹
然經史之言異乎世俗之爲時文試帖者及讀懷小編
於經史疑義雖至隱僻至瑣屑者鱗羅布列原原本本
其典覈似葉大慶之考古質疑而簡要勝之其精審似
袁文之甕牖閒評而詳贍勝之在近人說部中罕與倫
比然後歎先生之學之博而有要宜其發爲詩文者之

與世俗殊也時文試帖且然况進於此者乎然則此文
之必傳而無疑正不必如弇州山人四部稿以多爲貴
也其中有駢儷之文合而編之蓋古人文集原不分駢
散也先生於嘉慶丙子歲以優行貢成均而先君子亦
於是年舉於鄉至今歲而甲子周矣樾叨在年家子之
列因得讀先生遺書輒書數言於簡端俾學者知以根
柢爲重非可徒求之文也時樾亦編次先君子遺文爲
三卷將刻之吳中吾兩家於兵燹之後抱守遺編幸無
失墜而先疇舊德念之憬然小宛詩人之義又當與書
森共勉之者也

沈蓮谿先生筆記序

宋王明清撰投轄錄所載皆奇聞異事而其書止寥寥四十餘條蓋事果可喜可愕正不必以多爲貴如洪景廬之夷堅志至四百二十卷之多轉爲陳振孫所譏矣秀水沈蓮谿先生著述繇富其文集及懷小編殫見洽聞久已風行一時嗣君書森觀察又出筆記一卷見示事迹新奇敘次雋永而虛提督唐將軍諸條更足補史乘之遺當良朋萃至縱談及之人人傾耳不待投轄而客自留是亦投轄錄之比也末附小慧戲錄一卷雖屬文人游戲亦見前輩典型因勸書森并付剞劂以貽好

事者當不下公是先生之極沒要緊書也

馮景庭先生顯志堂稿序

自孔氏諸弟子各以其所學散處諸侯之國原遠而未分至於今益甚有曰性理之學則究性命辨義利者也有曰經世之學則策富強課農戰者也有曰經籍之學則窮訓詁考制度者也有曰載記之學則誌得失鏡古今者也有曰歷算之學則精推步測高廣者也有曰詞章之學則研聲律儷青白者是數者各得其質之所近各行其業之所習彼此相笑而莫能通孔子曰吾道一以貫之苟不得其所以貫萬猶不給也苟有以貫之

則此數者固可得而一若景庭馮先生其有以貫之乎
先生於余爲同館前輩同治中余膺吳下主講紫陽先
生亦主正誼講席時相過從其後先生移家木瀆距城
稍遠然歲必一再至談經史疑義又或縱言及於時事
甲戌正月猶過我春在草堂而是年夏余自武林歸則
已聞先生之訃矣先生既歿相國李公言於 朝建祠
於其鄉俾後進之士俎豆尸祝有所矜式而先生之書
亦遂次第刊刻行於時其嗣君申之培之以顯志堂稿
十二卷求序於余余讀而歎曰是吾所謂能貫之者也
先生於學無所不通而其意則在務爲當世有用之學

所著有抗議十五篇蓋漢仲長公理昌言之流方咸豐
同治間吳會可謂多故矣而於先生集中見二事焉則
皆大局之所繫其一迎師於皖皖軍至而東南以次底
定旋乾轉坤於是乎在其一滅三吳之浮賦四百年來
積重難返之弊一朝而除爲東南無疆之福而是二者
稿皆出於先生先生治經通小學故不爲浮詞尤精隸
首之學能推而行之清丈之法生焉敘庚申閒事有史
筆閒爲小文清而腴烏乎豈非吾所謂有以貫之則此
數者固可得而一乎先生以 廷試第二人官翰林負
重望咸豐初潘文恭公以先生與林文忠同薦使先生

大用於時其所設施必將赫然爲中興名臣之冠豈止於此而已哉然使後之人拜先生之祠而讀其書皆務爲有用之學則先生之澤固遠而大矣

小滄洲詩鈔序

小滄洲詩鈔二卷會稽朱庸堂先生撰余與其嗣君璞齋太守交最久亦最深乃得受而讀之其爲詩陶冶性靈琢磨風雅有縫月裁雲之妙無紙勞墨瘁之音小杜詩所謂玉白花紅三百首方處士詩所謂裁霞曳繡一篇篇可以移贈此編矣昔蜀韋毅選唐詩才調集十卷所取多晚唐人詩專以穠麗秀發爲宗及北宋之初有

西崑酬唱集乃楊億等十七人唱和之作其詩皆組織工緻鍛鍊新警誦之而音節鏗鏘詞采工麗使人之情爲之一往而深竊謂詩主溫柔固應如此及歐梅迭出詩格遂變雖蹤橫排奐突過前人而纏綿悱惻之意或反遜之近代學者喜言蘇黃山谷詩尤爲時尚其生硬之致固自可喜然溫柔之教無復存矣風雅遺意將遂散微余讀先生詩所以手不忍釋者愛其用意微婉立言深穩與古詩教有合也先生詩舊有刊本亂後亡失璞齋將重刊之余因書數言於其卷端願世之讀先生詩者知此爲詩家之正軌勿以側艷少之也

朱鏡香竹南精舍駢儷文序

昔楊子雲以詞賦起家論者以比相如使守其少作而不變則其沈博絕麗之才亦足雄視漢廷矣乃晚而自悔思託經術以自尊遂有太元法言之作後世卒未嘗列之於經而長楊羽獵之後不復發翰林子墨之麗藻或亦文人之左計乎余三十歲前好爲駢四儷六之文今賓萌外集四卷皆其時所作也四十歲後研求經義旁及周秦諸子兩平議粗有成書回視少作頗有雕蟲之歎卒之於經義所得至麤而欲復爲曩時妃青儷白侔色揣稱之作則遂不能矣含毫擲簡爲之慨然鏡香

大令登道光丁酉拔萃科余亦於是歲副賢書得附同年生之末及甲辰歲又與同舉於鄉君文章爾雅以詞華傾後輩咸豐閒君需次吳門余亦僑寓於是時相過從每見其湧思雷出書篋几杖之外殷殷雷金石聲著壁成繪在泉成珠輒驚喜讚歎而不能已俄而東南離亂朋輩星散彼此不相知及今歲之夏復相遇於吳中鬢毛斑矣乃出示所刻竹南精舍駢儷文稿則左挈江鮑右提徐庾其搜逮索偶之工翦月裁雲之妙猶曩時也余癡抱一經江郎才盡讀君之文真不啻聆九奏中之新聲食八珍中之異味矣因書此於其簡端旣識吾

媿且賀君文字之興老而不衰後福未有量也

丁濂甫同年蜀游草序

予與君同年成進士同得館選在京師時文酒讌游甚樂也每見君所爲詩賦雍容大雅不矜才使氣而他作者狂搜險覓終莫能出其右散館日爲

乾清宮賦予輩爲題所懾伏率皆掇拾文選字句模擬靈光景福而才實不足以稱之辭殫韻竭龐亂鉤裂而君仍爲近體小賦餘波綺麗寬然有餘然後知君伐毛洗髓之功深也同治庚午歲君奉使典蜀試試事畢又拜視學浙江之命既下車刻其所爲時文律賦以示

多士余旣得而讀之而今年春君又出蜀游草一卷見示蓋自京師首塗由秦入蜀又由蜀而楚以至吾浙所歷如井陘之險太華之高劍閣之巖巖瞿塘之轟輻無不見之於詩初不必如韓昌黎所謂險語破鬼膽者而每讀一篇令人如身履其地如目覩其景姚武功云格調江山峻功夫日月深君詩之謂矣余小有點定君頗不以爲謬猶憶三月間君招村蓮衢侍郎及余小飲署齋蓋三人者皆庚戌同年也酒間出是編共讀之光景猶如昨日而豈知君之遽作古人哉晨星零落可勝太息哲嗣麗生庶常以君遺意索序於余云將壽之梨棗

因於西湖精舍重讀一過不勝人琴之感矣
楊性農同年移芝室集序

功令凡歲陰在辰戌丑未之年季春之月聚天下鄉試
中試之舉人而試之禮部禮部以其數聞 天子親定
其中式之數率較每科成進士者率二三百人此二三百人相謂曰同年既同年矣然或相識或竟不相識既相識矣或相處如親昆弟亦或否焉蓋仍各以其氣類合也予與性農楊君爲庚戌進士同年然予在京師簡於交游同年諸君多不相識卽與君亦止一再見而已未幾皆乞假而歸相隔數千里君歸遂不出予歸復出

旋以事失官亦不復出蓋自與君爲同年未嘗得數日聚蹤跡之疏如此然予意中實未嘗忘君非以同歲成進士之故蓋氣類固有合焉君重節概喜文章不樂仕進一以著述爲事數十年來士大夫文體醜穢其卑者惟妃青儷白取悅俗目其高者矜言古文桀嫫貌爲簡老而無馳騁自得之樂獨君則不然凡所爲文章皆道其胸臆所欲言無所規撫而自合乎古之法度其詩亦然蓋以詩文論已卓然成一家矣嗟乎天下雖大而講求學問文章得與於作者之列者落落然不過十數人視夫進士同年每科率二三百人者孰難而孰易邪君

往歲與予書言始見吾駢儷之文而美之後見吾所爲
琴西同年詩序斂華就樸有一變至道之歎然則如予
者固亦日往來於君之意中古人所謂海內知己天涯
比鄰又豈在形迹之疏密邪因讀君移芝室集輒書數
語於其卷首所以見吾兩人之交以此而不以彼也

王夢薇入越吟序

王君夢薇蓋才而隱於下位者也能爲詩歌又善丹青
而尤長於駢儷之文古豔幽秀有六朝人筆意以君之
才求之館閣諸公亦未易觀而以末僚需次兩浙浮沉
簿尉閒良可慨矣余從前主講蘇州紫陽書院曾讀君

時文而未見其人今年春君始來見余於西湖精舍出
所作詩文見示并以入越吟乞序蓋君之近作也余讀
其詩五言如雲牽危石墮濤挾暗沙奔雲開鷹翻健風
細鶴鈴圓七言如寒欺酒骨眠難穩愁擁詩腸句不新
雲勢欲拖雙塔去雨聲陡合四山來皆可誦也讀既竟
喟然而歎爲誦白香山詩云袖裏新詩十首餘吟看句
句是瓊琚如何持此將干謁不及公卿一字書因卽書
此於其卷端

胡春波遺文序

同治乙丑余自天津浮海南回適吳下紫陽書院主講

乏人今相國合肥李公時以蘇撫攝江督與余有同歲之誼遂延主紫陽講席丙寅丁卯承乏二年遂得徧觀吳下人文之盛十載以來舊時同學諸子如吳清卿

徵誼卿大衡馮聽濤松生戴青來兆春皆捷南宮入詞

館其餘歌鹿鳴而舉於鄉者指不勝屈然余於吳下諸君子所尤心折者則爲胡君春波凡三年中行一十八課而春波之文往往在高等乃自戊辰以後余移主浙江之詒經精舍遂與春波疏闊始猶歲一再見比年來則久不相聞矣然余每逢鄉試之歲江南題名小錄至蘇必問春波中否而春波竟不售余大詫歎去歲有欲

延名師課其子弟者余猶以春波告乃今年夏蔣心香比部過我春在草堂出一編見示曰春波之遺文也屬爲之序噫春波卒矣余甚悲春波在諸子中以文而論固不居人後乃餘子半皆掇巍科登上第而春波竟抱璞以終也又念春波雖失意以死而其遺文幸尙可編纂或沈玉淪珠其身後得顯於世則又未始不爲春波幸也春波之文不務以彫琢爲工剽竊爲富而俯仰寬博無噍殺之音前後融洽無凌躐之弊每拈一題必使題理題神表裏俱到所謂清真雅正者庶幾近之宜其投之場屋無往不利而卒不得志於有司科名得失其

命也夫余主講江浙間每歲閱文多矣求如春波之理
真法密者不可多得誠得此種文懸以爲鵠旆亂鉤裂
之習吾知免矣是宜早付剞劂傳播藝林不獨藉以傳
春波身後之名且使讀者知文以理法爲主從此上窺
先正法程於文運未始無小補也獨余紫陽校藝時所
期於春波者豈止於此至今日而序其遺文也楊子不
云乎鍾期死而伯牙絕弦夔人亡則匠石斲斤三復茲
編可爲長太息矣

日本竹添井井棧雲峽兩日記序

文章家排日紀行始於東漢馬第伯封禪儀記其造語

之奇狀物之妙洵柳州游記之濫觴然所記不過登岱
一事耳至唐李習之之南行記宋歐陽永叔之于役志
則山程水驛次第而書遂成文家一體然其書頗略聊
志游跡而已未足模範山川鑄劍造化也夫吾人北轅
南柁束囊晨征車行則鞿馬鈴騾舟行則檣烏水狗此
豈細旃廣廈可以仰屋梁而著書哉又况游覽所至未
必能如惠子之載書五車自隨某山某水不過聞郵童
而諮津吏而欲考訂古今窮極原委抑又難矣竹添君
以東國儒官來游中土又非生長於斯者比余初以爲
游履經臨不過吟弄風月藉以排遣旅懷耳乃讀其所

著棧雲峽兩日記則自京師首塗由直隸河南陝西而
至四川又由蜀東下道楚以達於吳縣歷九千餘里山
水則究其脈絡風俗則言其得失政治則考其利弊物
產則察其盈虛此雖生長於斯者猶難言之而君航海
遠來乃能於飲風衣日之際紙勞墨瘁之餘歷歷指陳
如示諸掌此足以觀君之學識矣君重意氣喜交游在
海外知余之名及至中土訪余於杭州詰經精舍不值
又至吳下鴈廬春在草堂始得修相見禮而以此問序
焉因書此詒之

金眉生六幸圖序

往歲客有問余者曰子何著書之多也余告之曰蓋得
力於三無其一無錢孔子謂顏淵曰使爾多財吾爲爾
宰然多財必孔顏乃可他人而多財則受其累矣余郭
無一畝之田家無一歲之儲筆硯耕耨歲食其入僅足
而無餘以故目不能識秤星手不能撥算珠終日終年
一編而已此得力於無錢者一也其二無官凡居是官
必有是官之事卽近世以來未必各舉其職然出則僕
僕風塵大寒暑無閒歸而車滿其門履滿其戶旣罷去
而吏抱文書至高等身尙何暇治其他邪余三十歲始
入承明廬未四十卽失官而歸嗣後不復出無衣冠襪

藏之苦無簿書填委之勞此得力於無官者二也其三
無能詩曰我從事獨賢賢者固多勞也余有生以來人
閒可謂多事矣干戈徧於海內冠蓋交於海外賢士大
夫苦其心思勞其筋骨敝其唇舌猶若不足以勝之而
余閉一室而坐無過問者不材之木固無所用之此得
力於無能者三也乃今觀六幸翁之自紀其一爲貧卽
余三無之一也而君悉數其幸事以至於六則視余三
無而倍之多乎哉君之幸乎余雖以三無自足至是又
不能無媿於君何也余讀書苦不能記憶每讀諸史列
傳未終篇輒忘其姓名偶得一義不筆之明日遂失之

而君讀書無不能記余所不及者一也余未通籍以前
伏處三家村中作村夫子而已罷歸後又杜門不輕見
一客故落落寡交遊而君羔雁滿天下余所不及者二
也有此二不及豈得以三無傲君哉雖然君之不及余
者亦有一焉余無能而君多能也君自朝章國典以
及河渠鹽務水利荒政與夫寰內之形勢域外之情狀
無不犁然於心如示諸掌名公鉅卿咸就君而諮訪焉
得失可否待一言而決君坐是不得安居於家一歲日
月舟車者半視余之偃蹇曲園中者迥不侔矣君得無
幸者六而不幸者一乎或謂余曰子惟無能也故以有

事爲苦若才大如海者雖處盤根錯節從容談笑綽有餘裕夫何病焉余曰若然則君之多能又一幸矣天使君耳目無恙猶以爲幸况賦君以絕人之才智乎今而後請益君之六幸爲七幸

范月槎觀察仕隱圖序

范君月槎以觀察使者需次江南丁丑之春以事至姑蘇過我春在草堂手一編屬爲之序則曩者官國子監助教時所爲仕隱圖也余曰所施不同故有異名君前爲國子先生飽閒散而寡參尋有古人避世金馬之風謂之隱宜也今官觀察使者方將振飭紀綱激揚風化

爲一道之福星純乎仕矣其尙謂之隱乎斯圖也宜於昔不宜於今奚以序爲君曰否否吾今猶昔也昔備儒官固所謂廣文官冷者今以監司候缺亦惟掃地焚香彈琴詠風如是而已斯固隱者之事也吾今猶昔也余聞而異之旣而憬然曰此殆有道者乎古之至人尸居而龍見淵默而雷聲神動而天隨從容無爲而萬物炊累焉尙何仕隱之足言哉且夫仕而謂之仕隱而謂之隱世俗之見也有道者不然無仕非隱無隱非仕范文正公爲秀才時便以天下爲己任隱而仕者也謝太傅大人之容王公之度而寢處常有山澤閒儀仕而隱者

也仕亦隱隱亦仕蓋不以外物爲物有君形者存爾余
觀君之爲人和調而不緣溪益而不苛蕭然自得於窮
達之外昔之官儒官今之官觀察使一也雖使異日者
建朱節震華鼓總十連而督八州在他人視之以爲仕
宦之至榮矣而以君自視固與助教閒曹無異也則仕
隱一圖君固終身以之矣昔之隱小隱也今之隱中隱
也異日以大仕成其爲大隱斯爲仕隱之極乎姑書其
卷端以爲之券

羅景山軍門思痛錄序

壬申之春余於家兄王甫福甯郡齋見羅景山軍門爲

述咸豐十一年收復嚴州與賊相持以千七百人據斗
大孤城當賊四五十萬之衆糧盡援絕然猶守死至三
月之久然後去方言此時意氣慷慨口講手畫若太史
公敘述楚漢閒戰事委曲詳盡余回己心偉其人越數
日招飲於其署齋酒後出所自述思痛錄二卷覓示攜
歸讀之乃知君少負大志年十七徒步從軍大小千餘
戰無不舉旗斬將身先士卒所擒馘不可勝計卽間有
敗衄亦能全其卒伍自引而歸蓋卓然中興名將也我
國家承平二百餘年地大物博稂莠蘖芽大盜起於
粵西延易乎東南爲從古未有之劇寇論者謂唐黃巢

之亂不是逮也乃自咸豐二年賊由永安州走昭平爲
燎原之始以迄同治四年盡殲其餘黨于嘉應州而後
已首尾凡十餘年而君無日不在行間幾于無役不與
無戰不先及軍事大定乃覲縷生平年經月緯著此一
編戰功之多於此可見而十餘年中凡官軍與賊勢之
盛衰及同時共事之人賢否功罪無不具於此編豈獨
見君之將才哉抑亦可以觀史才矣君雖絳灌之倫而
雅好文墨嘗得晉江陳豐齋大令所緝史緯一書謂其
簡不失要約不傷嚴心好之爲補刊其原版之殘缺者
使成完書分貽同好因以全帙見贈并知余從事撰述

已付剞劂者積百餘卷亦索全集一部去嗟乎余章句
陋儒無用于世當江浙初定之日曾寓書李少荃爵相
同年訪求中興來名臣名將事實妄思讓著一書備杜
下采輯而年逾五十蹉跎未就辱君不棄問序於余余
何足以序君之書重違雅意漫書數語以誌執鞭之慕
抑余此次自浙來聞由錢塘江湖流而上道嚴州過蘭
溪所經如七里瀧童子灘皆君昔年鏖戰之處請攜此
編於歸舟讀之泉聲山色中猶想見君英姿颯爽橫槊
指揮時也

集文讀三
三

昔蘇氏璿璣圖縱橫往復皆成章句宋元間有僧起宗者以意推求分爲十圖得詩三千七百五十二首而明人康萬民又增一圖更得詩四千二百六十首今四庫全書集部有璿璣圖詩讀法一卷卽此兩家所演合成一編者也夫璿璣圖止八百餘言而得詩幾及八千首其神妙真非意計所及矣嗣是以後寂寥千載未有嗣音至 國朝康熙間永康才女吳絳雪又有梔子同心圖之作其圖凡一百六十五字左旋右折皆可成詩舊讀止回文詩數聯長相思詞數闕未盡其妙咸豐初應茶園明經瑩復就其圖潛心玩索得五言絕句六首七

言絕句四首詞三十二首又六言詩八首其鉤心鬪角之巧乃始稍稍呈露亦不負作者苦心矣絳雪以才女而兼節烈事湮沒幾二百年吳康甫大令爲其縣丞訪求得之屬黃君韵珊製桃溪雪傳奇以張其事又刻其詩集附以此圖固表揚節烈之盛心亦憐才之雅意也余因勸并刻應君讀法以詒好事者使海內錦繡才人因此讀法交相推廣或更有不盡於是者他日匯爲一集與璿璣圖讀法並傳千古不亦足見 昭代之多才而爲藝林之佳話乎

余蓮村勸善禠劇序

天下之物最易動人耳目者最易入人之心是故老師
鉅儒坐皋比而講學不如里巷歌謠之感人深也官府
教令張布於通衢不如院本平話之移人速也君子觀
於此可以得化民成俗之道矣管子曰論卑易行此蓮
村余君所以有勸善禠劇之作也今之雜劇古之優也
左傳有觀優魚里之事樂記有優侏儒之語其從來遠
矣弄參軍之戲始於漢和帝梨園子弟始於唐明皇他
如踏搖娘蘇中郎之類無非今戲劇之權輿而唐咸通
以來有范傳康土官唐卿呂敬遷等弄假婦人爲戲見
於段安節樂府雜錄則俳優不已至於淫媒亦勢使然

乎夫牀第之言不踰闕而今人每喜於賓朋高會衣冠
盛集演諸淫褻之戲是猶伯有之賦鶉之賁賁也余子
旣深惡此習毅然以放淫辭自任而又思因勢利導卽
戲劇之中寓勸善之意爰搜輯近事被之新聲所著凡
二十種梓而行之問序於余余受而讀之曰是可以代
道人之鐸矣樂記曰人不能無樂樂不能無形形而不
爲道不能無亂先王恥其亂故制雅頌之聲以道之使
足以感動人之善心不使放心邪氣得接焉是先王立
樂之方也夫制雅頌之聲以道之誠善矣而魏文侯曰
吾聽古樂則唯恐卧聽鄭衛之音則不知倦是人情皆

厭古樂而喜鄭衛也今以鄭衛之音節而寓古樂之意
記所謂其感人深其移風易俗易者必於此乎在矣余
願世之君子有世道之責者廣爲傳播使之通行於天
下誰謂周郎顧曲之場非卽生公說法之地乎

蒯子範太守判詞序

唐選舉志吏部擇人之法其四曰判凡試判登科謂之
入等甚拙者謂之藍縷故唐人無不工判語張鷟所撰
龍筋鳳髓判至今膾炙人口明人有以張文成判蘇文
忠表並課子弟者蘇文忠亦工判語然今所傳如五日
京兆判斷自由九尾野狐從良任便及敦召南之化此

意可住空冀北之羣所請不允類皆遊戲之筆此外不
傳者蓋已多矣由當時未曾薈集成書故也蒯子範太
守爲當代龔黃政事文學兼而有之嘗攝長洲令余厲
吳下聞其折獄時手自判牘時作儁語有古人電掃庭
訟響答詩筒遺意輒爲之忻慕曰佳乎吏也顧君事煩
而余性懶未得常見及君攝蘇州太守乃時相過從未
久而君移鎮江旋入都展覲拜夔州太守之命於是
蹤跡又疏闊矣今年自蜀中詒書并寄示判語一冊皆
昔年爲牧令時據情定斷援筆直書者也其處事之公
平察姦之明允固不待言而率爾命筆燦然成章有他

人支頤搖膝竟日不能得者君於堂皇高坐隸卒環侍之時成誦在心借書於手所謂文章本天成妙手偶得之與東坡判語同一風趣青錢學士癩祭雖富轉無此雋永矣至丁四姐王金妹等事尤見其用心之厚隨園詩云他生願作司香尉十萬金鈴護落花請爲君誦之余山中筆墨不過批風抹月評量山水得讀此編詫爲奇絕因勸君早日付梓傳布藝林無使此零珠碎玉長沈埋於司空城旦書中也

春在堂雜文續編三

春在堂雜文續編四

德清俞樾

湖南永明縣知縣陳君墓志銘

君諱濟鈞字貫千別字西卿先世自福建遷廣西潯州府之貴縣遂爲貴縣人世居縣城之西曰松柏社祖諱某有隱德能以周易筮多奇中尤精於醫父諱某孝弟誠篤工詩文通曉星學隱居教授道光紀元由府學生舉孝廉方正以母老不仕 詔賜六品銜君其第三子也生而聰敏讀書能見大義弱冠補博士弟子員道光九年舉於鄉屢試春官不第俄遭父喪旣葬廬於墓者

三載鄉黨稱焉二十四年以大挑一等得知縣分發湖南是時楚中有雷再浩之亂君從事兵間鞫所獲纍囚脅從者輒免之補永明縣知縣歷署攸縣鄱縣沅江縣桂陽縣皆有政聲其攝沅江也適遇水災請發常平倉以賑之活數萬人其攝桂陽也賊環攻之守禦有法城賴以完後因言軍事忤大府意失官大府旋悔議復之君以母老不願復仕遂己咸豐二年賊陷貴縣君全家避城南柳村賊至君夫人及適湯氏之孀妹及冢婦黃皆死之君聞難悲且憤逾二年又丁母王太夫人憂道梗不得歸焦肝灼肺始有心胃疾君次子瑀官浙江杭

嘉湖兵備道請於朝封君如其官瑀旋以吏議左遷大吏知其才留治海塘君詒書戒勉甚切同治八年至浙縱游湖山時學使徐壽蘅侍郎乃君分校所得士相見極歡而君以第四子珩官湖南爲生平宦游舊地樂其風土遂往就養十二年冬十一月二十七日卒於湖南年七十有六君配徐夫人以死難旌子七人璿早卒瑀咸豐十一年拔貢生浙江杭嘉湖兵備道降同知特用知府奏保道員乃璣江西候補知縣珩湖南候補知州璵候選從九品瑒瑛未仕諸子奉君喪歸將小葬槨湖人也於瑀爲舊部民瑀以狀乞銘諱不得辭銘曰

君仕於楚而卒於楚楚人謚思曰我召父位不甚達其
齡孔修名不甚顯其澤孔攸陳寔子孫爲龍爲鳳丹桂
五株我識其仲天祚令德報在後昆百世而下式此墓
門

贈中憲大夫章公墓志銘

國家當隆盛之時非特朝多君子也其布衣韋帶之士
亦必有孝弟著於閭門至行立乎鄉黨者雖抱淑守貞
不聞於時天必將厚其積而發諸於子孫以大昌其家
烏乎此吾所以銘瑩齋章公也公諱某字士玉瑩齋其
自號也浙江金華人生有至性七歲入鄉塾塾師爲說

論語入孝出弟之義輒有感發出告反面動如成人家
故清貧無菽水之資慨然曰瓶之罄矣惟罍之恥雖微
毛生捧檄之望敢忘仲氏負米之義乃以舞勺之歲棄
儒術習會計以養其親一日負甌石自外歸飢疲少憩
有父老憫之曰孺子得無餒乎遣以糗餌粉資公辭曰
吾親未得食吾敢先諸力負而歸厥考啟和公不善治
生念兒曹況瘁恆鬱鬱公每日必密置錢數百於父牀
頭俾得攜錢就二三老友游飲爲樂或是日囊無一錢
必稱貸以供之雖甌釜生塵而老人杖頭錢無匱也啟
和公嘗貸朱翁錢如千千貧未有以庚也公錙銖積累

數歲之久始親負而還之宋翁曰吾券已燬矣公曰父命也卒償如數烏乎宋翁之不責償公之必償以成父志皆古君子哉公之事親也食必精鑿飲必清旨有珍果嘉穀必以饌凡賈所入必歸之親已有所需則請之無私財焉執親之喪水漿不入口者三日杖而後能起遇忌日必疏食尤篤於兄弟有妹爲母所奇愛旣嫁公體母意餽問無虛日同產弟樸齋公自幼從公學賈教之書數晝食同衽夜卧同衾視寒暖問飢飽若慈母之於弱子然縣令張君手書誼篤壘篋四字顏其門欲以其事上聞力卻之乃已樸齋公卒公已卧病外舍諸子

祕不以聞疾稍閒始聞之卽輿疾歸哭之其室淚盡繼以血曰吾兄弟相依六十年無須臾離今先我死我何獨生爲自是病益不斟踰歲而卒公喜讀書雖服賈而一鐙一卷與老儒無異每讀南北朝及五代諸史輒廢書歎曰吾儕幸生 聖明之世無兵燹之災休養生息皆 君恩也宜何如圖報乎或謂草野微賤雖欲報無繇公曰循分守已勉爲 聖世良民是卽所以報也鄰里鄉黨有壯不能娶死不能葬貧不能自活者皆賙之歲大無糴穀於多田之家礮而糶之如市之賈而陰溢其升斗之數冬日製棉衣三百襲以施寒者歲以爲常

嘗曰必待力有餘而始謀濟人則終無濟人之日矣生平盛德事不勝舉其熟於鄉人之口至今稱道者有數事焉其一事公東郭外有地數畝栽柏樹百餘株歲收相實十數石一歲爲人私斫之守者以告公曰今歲饑饉是皆貧無食不得已耳勿禁也於是東郭之柏樹遂盡又一事公之鄰某氏子以圃質於公公厚予之值歸其券明年復以質亦如之又明年復以質應之無倦又一事公里中有不孝子詈其父母公曰是豈性與人殊哉每見之必與言父母鞠育劬勞及人子事親之道又歷舉古孝子事實以告之越半載子不復詈越一載具

酒肉養焉又一事公之戚某行年五十止一子將娶婦而天投杖曰天乎予之無罪也公曰君誠長者然嗜食牛犬肉或亦當戒乎某謹受教無何生丈夫子二公之言曰人以愛子之心愛親則孝子矣以愛身家之心愛民則良吏矣以責人之心責己以恕己之心恕人則賢人君子矣又曰農工商賈皆有益於人士而無益於人可乎在一鄉當思爲一鄉所效法在一邑當思爲一邑所效法使不善者皆化爲善此士之益於人者也公所言皆中理解雖樸直無文可書而誦也公之子果堂太守纂集公遺言爲一卷曰誦芬錄今撮其大旨著於篇

詩有之肆成人有德小子有造傳者又推本君德謂文王之德如此故大夫士皆有德子弟皆有所造成烏乎知言哉夫惟有聖人爲之君故久道而成化化行而俗美雖桑扈椽樞間彬彬多君子矣其父老既有君子之德則其子弟服習其教訓觀摩其行事謹愿者可以無過而其才智者則必能負聲振采大顯於世而其尤者至爲朝廷楨榦之臣盤盂鍾鼎焜耀無窮故詩又曰濟濟多士生此王國王國克生維周之楨我國家當乾隆之時重熙累洽比戶可封觀公之所爲而時之清平俗之休美可知也果堂太守以名進士爲賢太守得公

之教者深矣苟終身服膺而弗失則必且金榦玉楨爛然爲中興名臣其所造成豈可量哉樾生也後不及識公而兄林與太守同舉于鄉故獲在年家子之末太守不以樾無似以狀乞銘樾不得而辭焉按狀公生於乾隆三十三年卒於道光十六年壽六十有九初娶方氏生子二曰紅幼殤曰倬雲亦早卒繼娶李氏有賢德嘗侍公疾衣不解帶月餘焚香祝天請以身代公愈而李竟得勞疾先公卒生子二曰倬標曰格格亦幼殤倬標卽果堂太守也道光二十七年進士由禮部主事轉陝西道監察御史授福建泉州府知府於是請於朝贈

公中憲大夫方李皆恭人有孫男四人女七人曾孫男九人卽於公歿之年葬於縣東鄉之望府墩銘曰雖無位而有公輔之器雖不豐而有濟物之功雖不食報於其身於其後人烏乎百世而下欲知公之遺澤視此石

童嘯泉墓志銘

吾邑有躬行君子曰童君嘯泉其居家以實行爲主而不務名譽其爲學以致用爲要而不尙文藝古所謂君子儒也余蓋與同補博士弟子員而未得與之交光緒建元之歲距君之歿十有六年矣其孤寶善乃始具狀

乞銘余旣與同縣又同入學誼固不得而辭焉按狀君姓童氏諱履康嘯泉其字也浙江德清縣新市鎮人曾祖近臣祖繼宗父桂芳君生七歲而孤母朱太孺人命偕其兩弟入塾讀書夕自塾歸必使背諷其日所受經年二十一歲入德清縣學君念家無恆產無以爲養乃出而教授於杭州馮氏新市距杭州百里舟一夕可達君之在杭也閒日必作書問太孺人起居佐以甘旨之物歷十有五年無間焉其兩弟以貧廢讀君積脩脯所餘使營什一利以自食旣爲仲弟娶婦又爲季弟聘焉而已願未有室朱太孺人曰宜順長幼之序君曰不然

貧家作事非易在己者必能急也宜先弟其後仲與季皆生子而後君乃娶烏乎有弟而兄啼世俗之恆情也漢魯恭不欲先弟成名魏崔光韶於官婚榮利之事未嘗不先以推弟君此舉其有古人之風乎及朱太孺人疾君刲臂血爲書禱於神求減己算以益母凡懸衾篋枕歛簞及洗滌中裙廁踰必以屬其妻曰長婦職也時適大水兩弟皆失業君典質服物具饗餼其冬至不能衣泉著而治太孺人之喪一皆如禮仲弟婦卒撫其子女如己子女有再從子葆禾少而孤亦養於家孝乎惟孝友于兄弟君之謂也君讀書不爲辭章雕琢之學好

觀史書論兵法推古今成敗所由慨然有經世之志粵寇之方熾也君發憤作十策曰原德曰議戰曰論守曰料賊曰任將曰鍊兵曰籌餉曰安民曰勤後治曰保邦本皆切實可用今粵寇旣平士大夫謀所以善其後言人人殊寶善爲余言君勤後治一篇有三大端曰復庠序以宏正教曰一文武以起衰懦曰勸耕稼以備蓋藏余謂復庠序勸耕稼此孔子富教之成法也文武之不一教之失也春合諸樂秋合諸射古之士未有不兼文武者君此言豈俗士所能識歟咸豐十年杭城初陷君適在城盡棄其囊篋而攜通鑑一裘酒一鴟夷徙至破

屋中且讀且飲如平時會賊卽棄城去君乃出謂其親
故曰吾居患難中靜以待命而已無憂焉大亂之後米
價驟貴君采救飢古方凡方書中所言服之不飢者輒
身試之欲以活人其年秋偶得微疾遂卒年四十有五
娶卜孺人生子二寶善其長也同治癸酉科拔貢生次
子葆良殤女子子一銘曰
古之君子內行爲先維孝維友斯其本根聞君之風可
式人倫古之學者耻爲章句不能折衝奚取俎豆讀君
之書可覘建樹昔年泮水與君同游今日仙潭宰樹蕭
蕭克家有子其又奚求我刻貞石以銘其幽

卹贈知府銜安徽鳳臺縣知縣孟君墓誌銘

咸豐八年三月賊陷安徽全椒前知縣事孟君死之其
明年給事中方公濬頤等以聞 詔贈知府銜蔭一子
州判 賜祭葬銀如例又越十載爲同治七年兩江總
督大學士一等毅勇侯曾公從紳士薛時雨等言請於
全椒縣城建立專祠下部議從之於是其孤沅乃始設
位招魂葬衣冠於山陰縣棲鳧之原爰具狀就樾乞銘
樾方主詰經精舍講席而沅適奉檄監院事朝莫見焉
故誼不得而辭按狀紹興山陰之有孟氏蓋孟子四十
七世孫宋信安郡王諱忠厚者之裔從宋南渡因家於

越子姓繁衍析爲六支鳳塢其一也有諱英人者由鳳
塢而遷郡城之香橋卽君六世祖也祖諱明章父諱封
以縣令起家官至順天府東路同知母戴宜人生子五
君唐長生有異稟讀書一過輒成誦同知君教子嚴懼
染貴游子弟積習不令居官廨弱冠卽遣詣都下肄業
成均君儻居僧廬躬執炊讀不輟嘉慶二十四年應順
天鄉試中式是時同知君方任繁劇公私事旁午乃始
命君隨任襄家事君因於其間諮民情講吏治至道光
十六年大挑一等以知縣分發安徽同知君戒之曰州
縣之官民命繫焉柰何不愼吾服官二十載無他長惟

耐煩忍欲而已汝往矣苟分外取一錢非吾子也君至
徽權知旌德縣縣有汪四者以殺人繫獄刑有日矣君
察其辭色疑其寃請重讞之不可至於再至於三大吏
怒禡君職仍留訊是獄君研鞫竟得實殺人者出汪四
大吏大驚亟還君官旋丁同知君艱服闋還徽適太湖
有積案命君往受事甫半載案牘爲空十七年題補全
椒縣縣東南多圩田每夏秋霪雨江潮漲溢圩隄稍缺
卽成巨浸君在任兩遇水災嘗冒雨乘小舸督民修築
晝夜立泥淖中無倦容民咸感泣百其力有撤屋材助
成之者君又相視圩岸之不如法者命改築自是圩田

皆獲全被災之眾餼之於城活無算邑之中民衛田戶
參半而衛籍困苛派不聊生甚者破家君籌巨貲伙運
費刻文於石永禁苛派衛戶以蘇其催科不遣吏役方
春時親歷村聚勸諭父老使早納租課終君之任賦畢
輸無逋稅邑有井養書院垂廢矣君復之豐其既稟拔
其高才生飲食焉教誨焉風雪之夕循行閭里聞誦讀
聲輒識其門戶旦而使偵焉曰寒士也則月有饋饋以
粟佐以銀於是士爭向學矣惟西北鄉風俗雕悍爲盜
淵藪盜有巨魁曰陳曰孫君禽治之境遂無盜鄰邑有
巨猾湯氏子武斷鄉曲而罔市利捕獲置法一邑肅然

已而調鳳臺縣鳳臺與壽州同城民素悍小有言刃相
向吏尤詭譎匿其凶頑以要重賞乃罔恆獲君至履行
四鄉立保伍鈎攝之法奸無所容未及一稔盜賊屏息
囹圄空焉父老嗟歎謂數十年來未之見而君亦由是
得怔忡疾浸衰矣君性廉潔稟同知君嚴訓一介不苟
取又伉直不畏彊禦不阿上官遇事不合侃侃言不少
屈故二十餘年不得轉一階時戴安人春秋高又聞君
以勞成疾命之歸君遂以養親行奉戴安人寓金陵俄
粵賊自長江東下金陵戒嚴因奉戴安人避江北已而
賊由浦六北犯滁人聳大吏以全椒君舊治命協理團

練事全椒四面受敵城中故無民團君倡爲之隨地設
守東西扞禦與賊相持數年咸豐六年大旱斗米錢二
千君出舊治縣時所積穀平糶於市兵民賴之當是時
官軍營於和全接壤之河村步至八年三月賊大至軍
潰賊遂乘勝犯全椒城或語君曰公非守土官何俱死
爲君怒叱之率團勇至北關迎敵二十七日賊至益眾
鏖戰三時許君受創墮馬賊環刺之遂遇害有勇丁自
賊中跳身出述君死狀甚詳烏乎君故縣令也或不死
人猶諒之卒赴義如歸所謂致命遂志者乎璽書褒美
俎豆百世亦足慰君九泉矣距生於乾隆五十九年年

六十有五配張恭人生子一沅也咸豐二年舉人仁和
縣學教諭女四上元黃家聲吳縣石霖六合劉家忻江
甯甘元煥咸其壻銘曰

戢暴安良古之循吏百里域之未竟厥施曰歸將母終
死王事孟氏遺言舍生取義君允蹈之無忝其裔天祚
忠孝將昌爾嗣俞樾作銘以告來世

余蓮村墓志銘

同治十有三年冬十月丁丑蓮村余君卒於蘇州蘇之
人無識不識咸大息曰善人亡矣越二月其門下大生
有鄭君者以余孝惠先生年譜來乞銘其墓孝惠先生

蓋其門弟子所私謚也謹按謚法慈惠愛親曰孝勤施無私曰惠君之行允副此二者矣余初不識君辱君見訪於吳中寓廬屬續之際猶手一冊屬其弟子轉以示余期以昌明正學廓清異端所責望者甚厚然則銘幽之文余安得而辭謹按年譜君姓余氏諱治字翼廷蓮村其自號也先世居武威元淮南宣慰副使忠宣公守安慶死之其次子德旺避居梁溪青城鄉浮舟村遂爲今常州府無錫縣人十四傳至維樛維樛生昭燎昭燎生茲恬茲恬生來貢是爲蕙田君則君之考也君生時母孫宜人夢五色雲墮其室及生以叔父書田君無子

爲之後季父藍田君亦無子兼祧焉九歲讀書於塾或授以俗本酒詩君曰酒乃誤人之物辭弗習其後從李申耆先生游先生甚重之爲書田蕙田兩君作家傳曰二公篤行碩德雖未獲自顯令子治克自振拔爲吾黨重其益勵所學立身行道上慰先人乎君感其言始有濟世之志當是時江南方承平風俗浮靡市井之子酒食徵逐士大夫亦徒以文藝相尚君獨慨然以人心世道爲憂思有以維持補救挽回劫運以爲聖賢經傳非愚蒙所能通曉宜以淺近之言發明之鄉塾舊有神童牙象詩諸書蓋宋時村書之流亞詞意卑陋君仿其體

例別撰五七言詩以課童蒙又以 功令重四書文乃
從先正文稿中擇其可以感發懲創者都爲一編俾求
名之士知以積德爲本蓋君之爲教皆在因勢而利導
之其後遂有勸善禱劇之作大意以俳優侏儒最害風
俗然由來久遠旣不能廢則莫如因而用之乃仿元人
禱劇采取近事被之管絃使善者可以爲法惡者可以
爲戒烏乎君之用心可謂曲而至矣生平善事不勝書
其規條詳所著得一錄中而戒溺女禁淫書則其尤致
意者東南大吏頗采其說下所屬施行焉當江浙陷賊
時君著劫海迴瀾文又繪江南鐵淚圖見者無不感泣

鄉愚婦豎咸切齒腐心願與賊俱亡東南之底定固由
師武臣力而君之書未始無功也余嘗寓書合肥相國
言及君相國復書曰蓮村余君吳中善士久耳其名然
則君之善聲固藉藉公卿間矣君爲金匱縣學生五應
鄉試不中式遂絕意進取大吏錄君功由附生保舉訓
導加光祿寺署正銜妻顧宜人無子以兄子蔭培兼祧
女子子三長適陶育二三未行是歲十一月己未蔭培
奉君之喪歸權厝於浮舟村之東圩余爲之銘須其葬
納之壙其銘曰
古三不朽曰德言功言之可重功德與同如何後人輩

祝求工無益於世或興厥戎君獨不然意在發蒙其說
彌淺其效彌崇惟將忠孝化彼愚蠢海外景教流行域
中不端其本言乃愈詭詒我一編其理平庸未充營衛
勿去其癰欲除盜賊宜崇其墉君言孔嘉我衰且窮愧
無以報有慙予衷敬將此意銘君幽宮

王梅庵處士墓志銘

台之黃巖縣有隱君子曰梅庵先生余不及見其人而
獲交於其子不得親炙其言論而獲讀其書以書之所
言合之其子子莊孝廉所爲行狀蓋敦行不怠之古君
子也先生姓王氏諱維祺字道齡梅庵其自號也先世

居縣之南鄉曰道與其九世祖諱世補始遷縣東之柔
橋村曾祖諱聖倫祖諱文標父諱宣澤字兌齋母盧孺
人先生於兄弟行最幼居第四自童孺時資性純謹不
與羣兒伍七歲入小學所業倍他兒年十一從符先生
龍文學爲制義後屢以貧輟業符先生與先生之姑之
夫馬君朝陽縱與之遂就學如初先生旣屢廢學懼無
所成益自刻厲學日進年二十四補博士弟子員是時
盧孺人已前卒兌齋君以一門數十人無內主析其產
爲四俾諸子自爲計先生由是不得專力於學一應鄉
試不中式遂不與試出授徒籍脩脯供甘旨凡十年兌

齋君卒乃謝生徒家居讀書不復出矣先生貌清癯長
不逾中人而舉止端重望之儼然事兌齋君以敬以順
無幾微之忤事諸兄尤友愛方析產時諸兄或有所嫌
輒損己貲以和解之其居家也稱有無以給衣食存贏
餘以備不虞雖一錢尺帛皆有文籍可稽也自奉甚約
而族黨故舊之貧者必周之不以匱乏辭或爲人解紛
息訟不自以爲功而受人之惠罔不報方從符先生時
館於蔡氏蔡媪視先生甚厚愛之如子後媪貧不能自
存月餼之粟媪卒經理其喪葬焉與人交必以誠信非
其人則遠之所與善者終身無間言配徐孺人無子勸

納造室先生曰二女同居其志不相得吾懼焉蓋子兄
之子徐不謂然乃副以何孺人何柔婉徐愛之先生又
撫御有方閨門之內賓如也已而孝廉生先生教之以
義方大要歸於樹氣節慎交游存寬厚孝廉輯之爲家
訓六篇曰述德第一曰立品第二曰勤學第三曰治生
第四曰禠訓第五曰遺聞第六先生雖以貧廢學而好
之不衰至老而四書五經尙能背誦子史諸書亦皆流
覽得其要領孝廉嘗曰吾少侍先君隨所質問其應如
響以爲爲師者類然及就外傳每有所叩師或不能應
歸以質先君無不知者然後知先君之學之深也所著

時鳴集一卷有真意齋雜纂二卷醫學約鈔四卷余皆未之見所見者家訓六篇孝廉所編次也又爲柔橋王氏譜未成孝廉卒成之先生生於乾隆四十四年閏六月十一日卒於咸豐七年十月二十三日年七十有九徐孺人生女子三其壻曰符禹九曰趙仁山曰夏印卿側室何孺人生丈夫子棻字子莊同治六年丁卯科舉人又女子子六喻興雲何福饒虞大用徐維齡牟泰豫顧用光皆其壻也其適符氏喻氏者俱早寡守義不嫁適何氏者亦早寡遇賊不屈死孫四人日憲日恪日愷日恂孝廉既合葬先生及徐孺人於白龍山之原虛

其左爲何孺人生壻書來乞銘銘曰

位不列於廟堂而行則信於父兄名不出於鄉里而澤則被於孫子名位雖晦德孔修厚其本者豐其條烏乎先生之風永無斲千載而下視此石

朝議大夫婁公側室陳孺人墓志銘

故朝議大夫炳南婁公有側室曰陳孺人順天府霸州沙後村人其家世故微也而莊姝婉變有大家風年二十有四始以巾櫛事公當是時公年踰六十矣其諸子皆仕宦家門鼎盛中外戚屬恆四十餘人孺人日惟事公之事暇則事鍼管線續又暇則靜坐不臧否一人不

縱與一事家人以是咸敬愛之其明年冬公寢疾逾年不瘳孺人奉侍惟謹藥石焉饘醢焉悉手治之下至中褻廁膾身自浣滌不委之倭御俄而疾革孺人割臂肉羹之以進祕其事無聞者及公卒始涕泣言之自傷誠意微薄不足感動晝夜哀號欲以身殉防閑者眾不得間越月餘竟歐血死時咸豐七年三月也年二十有七生女子子一殤無子遺言願附公兆域以終侍公之意嫡諸子從之禮也嫡孫椿來乞銘銘曰
三心五噉其光微彼姝者子乃有夔莊事所天無詬譏夫病不辭剖其肌夫亡遂欲摩其笄卒從地下相扶持

同穴之義非有私我書貞石葬其隈欲表女宗茲可稽
候選訓導連君墓志銘

濱東南皆海也而吾浙海濤異他處衍溢漂疾易爲患朝廷歲糜金錢以巨萬計築塘捍之海水猶或鬻入蕩田廬凌岡壟然則塘工尤要哉余於咸豐末避地上虞之查浦其地負海而前臨曹娥江土人謂之前海後海前後皆有塘塘工險要爲浙東最父老每爲余言樂川連君從事於江海兩塘者十餘年吾儕至今安全者連君之力也余固已知君之爲人至光緒二年君之孤以君事略乞銘其墓則君已古人矣按事略君諱仲愚連

川其字也上虞人曾祖雄飛祖彭年四川忠州直隸州知州父聲佩候選通判君自幼爲忠州君所奇撫其背曰可兒可兒異日興我家者此子也及應童子試冠其曹然君不屑爲科舉之學友於兄弟厚於本支信於朋友其器識之宏學養之深言之篤實材幹之優裕事略所載未得其十一余無以言也舉其一瑣事云兒時偶大嘍鄰人趙傻抱至瓜田摘一瓜子之乃喜爲之笑六十年後追念此事買田二畝與其孫爲趙傻祭田卽此一事可見君之爲人矣君生平落落大者在前江後海兩塘上虞之西鄉曹江在焉其上爲新昌嵒縣萬山

重疊眾流奔赴下接大海潮汐洶涌而乾隆以後外來流民盜種山場每逢大雨山中泥沙隨流俱下溪河先淤而江身亦日以高江高而水大水大而塘危道光三十年秋八月霖雨連日風潮大作決大口十有七布政使汪公臨視借庫銀三千兩命知縣張公致高修築之張公以屬君君寢食於工次者一年有餘而十七決口皆合咸豐三年海水逼塘下護沙不盈十丈而江塘適又決大口三權知縣事林公鈞議築決口及修前後塘又以屬君君自是奔走於前江後海無暇日矣君以爲善治病者必治病之所自來善用兵者必不使敵臨城

下於是有創修臨江大牆之舉牆成凡三千六百丈而其內土塘有重關之固於是首險次要各工乃得次第經理而賀家步柴塘厥工尤鉅先是塘之最險者曰孫家渡爲江海互激之區其後因孫渡嚴守無可乘乃移而衝突賀家步海潮西上江水東下激而怒起高過於塘塘內一河之隔皆民居也地形局促不能加廣卽無可增高君乃議築柴塘八十餘丈以分水勢至今賴之然君之言曰水勢遷移不定則隄工夷險無常安知今日之次要非異日之首險孫家渡賀家步其明徵也而後海石塘歷年旣久日就傾圯數百里民命全係於此

每至塘上輒徘徊不能去同邑有邵培福者感君高義創設管塘會君甚嘉焉命其會曰眾擎捐田四十畝入會中鄉里慕義者咸附之先後得田二百餘畝歲入其租以供修築之費君以孫家渡爲全塘扼要之地卽於其地建別業一區藏皮書籍襍蒔花木顏其堂曰留耕山房平時養老於此有事卽爲公所其中有捍海樓憑欄而望則江海形勢皆在目中君雖老且病猶可於此中卧而治之孰意樓成而君旋卒也君卒於某年月日年七十歲上虞縣學生候選訓導加光祿寺典簿銜配某氏生丈夫子六人茹副貢生候選內閣中書芳候選

州同夢藻符俱國學生蘅優廩生孫十一人入邑庠者
三人曾孫一人君所自著有塘工紀略四卷都凡海塘
四千七百六丈江塘六千六百二十六丈皆君手所規
畫故言之甚詳余刺取其事銘君墓又附敬睦堂條規
則以瞻族黨鄰里之貧者連氏子孫所宜世守者也銘
曰
庚辛之際道路荆榛君運於海以食飢民大亂初定百
度一新凡百有爲惟君是詢功在黷舍利及民田君所
措意尤在海濱經之營之垂二十年前江後海無役不
親微君之力民其介鱗何以報之視彼後人

候選訓導葛君墓志銘

自昔循良之吏必以教化爲首務兩漢所紀修橫舍立
校官皆良有司事也厥後有司與學校分職政教始歧
而爲二然士大夫有世官庠序克稱其職者往往起家
爲循吏不於其身卽於其子孫嗚呼吾持此論久矣乃
今以銘雲莊葛君之墓君姓葛氏諱龍光字穎波雲莊
其自號也先世於明初自山西洪洞縣遷河南許州城
北蘇橋村遂爲許州人曾祖廷敬本生曾祖丙辰雍正
十年舉人祖元福候選州同父萬全由孟津柘城教諭
升南陽府教授君生於儒族幼穎悟嘉慶十八年入州

學旋補廩膳之額君之仲兄重光爲安徽泗州州判君
往省之州判駐洪澤湖之濱其地距州城百里民俗剽
悍道光八年大無亂民蠡起闖入州判署君率家眾禦
之傷焉旣而察其眾皆烏合耳曉以利害咸解散遂以
無事道光十五年君父教授君爲柘城教諭明年君攝
鹿邑訓導柘與鹿鄰邑也父子鄰比爲校官時人榮之
至道光三十年而君之子兆堂爲鹿邑訓導又卽君秉
鐸故地家世相承以俎豆爲職世以比孔穎達之三世
司業可謂盛矣君嘗訓兆堂曰凡人志氣精力難振作
而易銷沈宜及時自勵以冀成立陶士行之運箴可法

也故不止授以詩文格律并爲招延拳勇之士使之習
射御角力及兆堂應州試入學冠其曹君手書數百言
戒之勉以有用之學蓋君雖終於儒官然其所蘊蓄固
甚宏矣兆堂以軍功由訓導遷知縣在江蘇歷宰大縣
有循聲蓋由承君之教又其家爲學校官者且三世耳
目濡染無非禮樂教化之事故與俗吏殊也孔子曰君
子學道則愛人斯其徵歟君未仕前曾幕遊於皖旣謝
鹿邑事又一攝光州學正其晚年復客靈璧先後在皖
者十餘年所交多知名士以詩畫自娛樂道光十八年
自靈璧還柘城學舍省教諭君起居俄而得病十二月

丙申卒年四十有一蓋卽兆堂入學之歲也君自經史
外禠藝無不通曉常侍其母喬夫人瘡疾時夫人年七
十矣諸醫咸束手君用大黃治之卽愈又研究音律善
絲竹所著詩文經兵亂散佚故無傳也配李夫人長葛
人其在室也值歲饑卽能鬻衣襦質釵釧佐家人食餓
者旣歸君而賢益著君之卒也念親老子幼忍不死治
舅姑之喪皆如禮方析爨時止受屋之半及田九十畝
其餘固不較也及兄公亡撫其子女如己出兆堂官鹿
邑時從之官感念今昔每爲慨然咸豐二年鹿邑有劉
同源者創邪說惑眾將作亂邑人聳左右私相告語太

夫人聞之命兆堂言於邑宰掩捕得之脅從皆散境內
帖然其明年粵賊陷歸德鹿邑亦戒嚴太夫人時在里
寓書勉其與同城文武努力戰守歸德屬邑先後失守
而鹿邑獨完及宦江蘇太夫人就養來吳於光緒二年
二月癸亥朔卒於吳縣署距君之卒三十九年矣年七
十有八子二人長兆堂也江蘇蘇州府吳縣知縣候補
直隸州知州 奏保以知府用加道銜光緒初恭遇
覃恩遂加四級 贈君通奉大夫而太夫人亦受封焉
次震堂候選訓導孫六人世薰世苞世藹世蕙世芳世
蔭孫女三人韓元啓高其嘉高其文咸其孫壻曾孫五

人兩臣喜臣潮臣鼎臣賡臣當咸豐中余奉使河南已知兆堂賢及罷官寓吳下而兆堂適宦吳遂相習也兆堂兄弟奉太夫人之喪歸而乞銘于余蓋君之葬於許州蘇橋河陽之原已三十七年至是啟而合葬焉禮也銘曰
學校之職古昔所崇教始於身由家而邦移風易俗庶幾時雍維君家世學爲儒宗祖孫相繼俎豆是共被服嫻雅不與俗同有子起家爲黃爲龔學道愛人報之者豐謂余不信銘此幽宮
候選郎中徐君墓志銘

同治之初 朝廷削平禍亂 詔下各督撫撫循其民與天下休養生息而其時賢士大夫亦能仰承德意完殘奮怯起瘡痍而衽席之蓋禽翦草薶戡定四方諸將帥之功也教養兼籌以奠其後則賢有司之功而其鄉之士大夫亦與有力也江蘇之震澤縣有震澤鎮亦一大鄉聚也鎮人有寅階徐君者其鄉之賢士大夫也今年夏徐君之子澤之以狀乞銘其墓余讀而歎曰此於大亂之後助 朝廷勞來安集者也於法宜銘謹按狀君姓徐氏其先爲徐偃王之後以國爲氏明季有諱曠者自淮渡江十傳至永昭始居震澤鎮是爲君高祖永

昭生觀光觀光生學健同治初以孝子旌學健生三子長諱醞字玉書君所考也次諱榮森字湘波是爲君本生父自高祖以下咸以子孫貴顯迭膺封贈爲鎮鉅族道光二十九年大水湘波君爲粥以食餓者君時尙幼已能左右之湘波君異焉君有二弟皆以劬學死湘波君乃命君輟讀治家事當是時金陵久陷于賊而蘇杭諸巨室猶承平舊俗繁富夥鈞以奢靡相高君喟然曰燕巢幕上而以爲安不亦慎乎乃務爲節儉有餘貲輒市穀以備緩急俄而大營潰蘇垣陷君以搏力句卒之法衛鄉里有眾一旅賊至苦戰卻之然眾寡勢不敵

時吾湖趙忠節公奉命總理湖郡團防君乞援焉忠節以出境勦賊慮餉不繼君乃盡出所儲以助兵食忠節喜曰蕞爾一隅乃有同志如君者乎率偏師來鎮會攻平望克之而賊來益眾湖軍適有他警旋撤去賊圍四合火於上風君知事不可爲身殉無益突圍出而鎮遂陷君奉湘波君走滬上尙圖再舉而君亦病病中猶時搥牀大呼殺賊也同治元年今爵相合肥李公以巡撫駐上海聞君之才檄辦上海撫卹事湘波君諭之曰今東南淪陷惟存上海一邑四方之民走來歸者如爵叢獸曠汝旣與斯役盡一分心造一分福毋惜費毋憚

勞又曰家鄉故舊流離可憫汝其念之君泣受教乃謀于同里施君少欽鳩巨貲郵鄉里以振乏絕命之曰興仁之會其時爲賊蹂躪之區皆不得耕閒有耕者賊伺其熟刈之民耕而不得食大困洋人趨利載米數十艘以往官曰是齎盜糧也議有禁君爭之曰賊何患無米其患無米者陷賊之民也是濟民非濟賊請勿禁且請勿抽其釐米船咸集災黎以甦三年江蘇平邑令萬公屬君以善後事君請先施粥一月一月後擇其尤貧者旬餼之粟以三百人爲額至今循之大亂初定百廢未舉而君適奉檄辦內地絲捐因請於絲捐內計包抽釐

以供善後之用於是平治道涂修造橋梁建復書院疾病者藥之物故者樁之暴骨者埋而揭之孤無父者育之是曰保嬰寡無夫者衣食之是曰恤嫠兵革之後向之質庫皆廢鄉民重息以貸無應者蠶在箔至無以飼生計益窘官議集富商設公典商皆時踣君首出貲爲之倡兩浙江南之有公典自君始也邑中善舉無不取決於君口講指畫每日自辰逮於酉凡事之待舉者及有宜變革者隨時書寸紙粘臥室壁次第行之雖細無遺亂民畢永泉陸効庭期其黨於某日起事君偵知其期密言於巡撫丁公檄縣令掩捕得之竿其首遂以無

事太湖漶港久淤塞有 詔開濬君隨同沈太守偉寶
履行其地度深淺計宍隆開竇灑流數月而畢又以本
鎮運河爲蘇湖往來要道瓦礫填積舟楫不通乃言于
官開正河自西迤東又開支河之在南北者凡二百八
十丈有奇君勇於任事尤好獎勵後進族黨之無恆產
者其子弟十齡以上君察其才器秀穎者使之讀書樸
愿者亦授以所業賴以成立者不下百餘人歲在癸酉
子濟之舉于鄉僉曰爲善之報也君在道光中已議敘
光祿寺署正後以籌餉功得候選同知 賞藍翎以善
後事竣易花翎君遂援例改郎中加五級躋二品封祖

父母父母如其秩而君精力猶壯至是擬率濟之入都
俾應禮部試而自赴部供職乃未及成行而母沈太夫
人卒君悲號成疾絲歷年餘竟以不起光緒元年元旦
君集族人議修宗譜建義莊及病篤又手書數百言訓
其子猶拳拳以修譜建莊二事爲言是年九月乙巳君
卒年三十有八娶周夫人生子二長澤之同治十二年
舉人候選內閣中書次望之湘波君之存也以君弟鎔
甫咸甫兩君俱無子命以望之爲鎔甫後而兼承咸甫
之祧女子子三人皆殤光緒二年九月癸未澤之等葬
君於浙江烏程縣馬要村余雖不識君然重君之爲人

是能於大亂之後爲 國家勞來安集者也故撰次其事而係以銘銘曰

東南底定同治之初量字雖復元氣猶虧惟良有司莫厥攸居誰其佐之賢士大夫恢恢徐君密慮深圖曰莠宜去曰粟宜儲曰湖宜濬曰道宜除曰幼宜學毋任呶呶曰養宜恤毋使歔歔浸仁沐義民氣以蘇求民之利忘躬之劬未登中壽咸曰於戲雖不永年澤在鄉閭有子英英早登賢書積善至蕃斯言豈誣千載而下式此幽墟

沈懋卿事釋疑

桐鄉沈君懋卿一鄉所稱善士者也其嗜善也如芻豢其赴義也如不及其於人也寒者衣之飢者食之病者藥之死者棺之櫛之埋而楊之嬰兒失其母者乳之餼之當庚辛之亂扶攜提挈其三黨之族姻以避寇鋒辛苦墊隘卒不相舍以安以全者無慮數十家由是數百里間無識不識咸以善士稱之初無子中年以後舉丈夫子二其鄰有不戒於火者火及其間天反風以免僉曰善士之報也乃於乙亥之冬竟以牆壞壓而卒禮有之死不弔者三畏厭溺沈君善士宜備五福而反死於三不弔之一向之稱善慕義者至是而不能無疑曰

是殆有隱慝焉有舉其事以問於樾者樾曰隱慝之說始於左氏僖公十有五年震夷伯之廟傳曰展氏有隱慝焉使展氏誠有隱慝則天且震其廟必不昌其子孫而展氏之後乃盛於魯且生和聖焉其無隱慝明矣夫隱惡而揚善者舜也不逆詐不億不信者孔子也奈何襲左氏之誣辭以疑善士乎然則其壓而死奈何曰此古人所謂遭命也禮記祭法篇正義引援神契云命有三科有受命有遭命有隨命又從而說之曰受命謂年命也遭命謂行善而遇凶也隨命謂隨其善惡而報之是人之壽命有此三科受命者正命也餘二者雖皆非

正而有遭與隨之異沈君之死行善而遇凶正所謂遭命者世人不讀古書不知古義挾私意以測之謂必有一致此則是有隨命而無遭命古人所謂三命者缺其一矣且子不聞禍虛之說乎漢王充著論衡有福虛禍虛之篇大旨謂世人以受福佑者爲行善所致被禍害者爲行惡所得其實窮達有時遭際有命一身之行一行之操前後無異而一成一敗一全一壞乃遭遇適然耳以是言之沈君之無子而有子遇火而反風福也福固虛也遭遇之適然也其後以牆壓而死禍也禍亦虛也遭遇之適然也世人不察見其得福從而夸美之見

其得禍從而譏笑之其亦未離乎流俗之見矣論衡禍
 虛篇廣徵博引娓娓千言謂子夏喪命以有三罪則伯
 牛癘疾宜有十過子路菹醢當有百罪也蒙恬之死以
 絕地脈則顏子何以夭亡李廣之不侯以殺降卒則孔
 子何以不王其言可謂辨矣而其理猶有未明及讀其
 命義篇始有以得其理命義篇曰性與命異或性善而
 命凶或性惡而命吉操行善惡者性也禍福吉凶者命
 也或行善而得禍是性善而命凶或行惡而得福是性
 惡而命吉性自有善惡命自有吉凶命吉之人雖不行
 善未必無福凶命之人雖勉操行未必無禍烏呼斯言

盡之矣余故以沈君之死歸之遭命又引王充福虛禍
 虛之說而以性善命凶為沈君定論世之致疑於沈君
 之事者其亦可以釋然矣

春在堂雜文續編四

香山以五十四歲官蘇州刺史其明年歲時有云
 且喜年年作此主蓋在蘇州所
 作也夫白公以文學而兼政事為政風流昭耀千古然
 以曹逢善室之長善事方與不樂居要路其在蘇也亦
 不久而去所謂年年作此主者走付之虛語而已沈君
 中丞由奉天府拜蘇藩之命亦適屆五十四歲與香
 山庶幾年同符至今年則香山所謂今歲年五十

其得禍從而譏笑之其亦未離乎流俗之見矣論衡福
福篇廣徵博引娓娓千言謂子夏喪命以有三罪則伯
牛癘疾宜有十過子路殖醢當有百罪也蒙恬之死以
絕地無歸顏子何以天亡李廣之不侯以殺降卒則孔
子何以不王其言可謂辨矣而其理猶有未明及讀其
表齊堂縣文獻齋四
命義篇曰性與命異或性善而
命凶或性惡而命吉操行善惡者性也禍福吉凶者命
之乖吝其亦可以辨然矣而命凶或行惡而得福是性
善之歸而以卦善命凶為善者豈歸世之姪疑於此皆
盡之矣余竊以世昏之冥謂之數命又臣王宗師盡斷



春在堂稊文續編五

德清俞樾

為張子青前輩作

恩竹樵中丞五十有五壽序
昔白香山以五十四歲官蘇州刺史其明年賦詩有云
今歲花前五十五又云且喜年年作花主蓋在蘇州所
作也夫白公以文學而兼政事為政風流照耀千古然
以遭逢唐室之衰黨事方興不樂居要路其在蘇也亦
不久而去所謂年年作花主者徒付之虛語而已竹樵
中丞由奉天府尹拜蘇藩之命亦適屆五十四歲與香
山荏蘇年齒相符至今年則香山所謂今歲花前五

五者也而是年春公已被命攝漕督旋權蘇撫玉節
金符綠鞵紺纓蓋不久而真除之命下矣夫今之督
撫唐之節鎮也香山詩所謂萬人開路看百吏立班迎
仕宦之榮無踰於此而公已身被之然則年齒雖同符
香山而遭遇盛時致身通顯蓋遠過之矣公家世文
通武達軒冕相襲公以門資在擁樹之中已注官牒及
歲就試輒居高等內歷白雲之司外居黃堂之位俄遷
觀察旋擢都轉陳臬事於皖江臨事侃侃有赤石不奪
之節昔范純夫數上疏極激切文潛少游輩懇勸不回
曰吾出劍閣關稱范秀才復爲布衣何所不可公之風

節正與相似角巾野服退就私第闔門養威將及十載
中興之始蹶而復興仍由觀察而都轉而廉訪光復
其初瀋陽古黃龍府爲昭代龍興豐沛之邑太白之
山鴨綠之江雄秀甲天下公尹京作翊六載於茲訪四
樓之遺蹟尋三河之舊壤政事多暇獻詠方滋吏肅民
和帝用嘉焉不次之遷肇始於此今由方伯而開府
水大鱗舒風高翼展其造福三吳之民而上副聖天
子倚毗之重者豈有涯與羊叔子以寬厚宏其化杜征
南以文雅播其猷吳人至今稱頌不衰公其兼之矣之
萬嘗與同官於吳當公攬揆之辰竊獻此言爲稱觥之

助夫公之豐功偉略隆隆日上夫人而知之其曼福綈
齡如川方至亦夫人而信之不待鄙言爲之脣飾也姑
誦香山太傅年年作花主之詩爲公慶且爲吳人慶公
其欣然而進一觥乎其哉三吳之月而土隔
方子穎觀察五十壽序
壬申之春余發錢塘江湖流而上自巖而金華而處而
溫水行則有七里龍之迴沈縈滄陸行則有桃花嶼之
巖巍嵯峨其間澗曲崖深巖層岫行丹青綺分望若圖
繡清風鳴條山壑俱響顧而樂之不復知有登涉之勞
矣既至溫則崇山峻流爽秀尤異觀察使者子穎方君

吾故人也一刺入託曰豈來游雁宕乎遂留飲於其署
中之且園且園者康熙間司寇高公所建也司寇名其
佩字韋之嘗爲溫處道工詩能以指濡墨作畫至今海
內猶珍之園其所手葺林疏石瘦頗有畫意歲久傾圮
君又新之花嶼竹齋風亭月榭視舊有如焉是夕小飲
既酣翦燭清話夜午未休并出示雁山游記一編余讀
未終恍如置身七十二峰間看大小龍湫從巖澗中飛
流而下矣次日又觴我於曾氏之怡園園有花木泉石
亦東甌一勝地余詩云領略怡園好風景不辭半日此
流連謂此也夫余以省親聞中假道永嘉小住半日猶

流連而不能已君乃於山水鄉爲雁山作主人此其福
爲何如邪昔高公官至刑部侍郎而終身以且園自號
蓋雖敷歷中外不能忘且園也君詩畫不下高公而政
治之美過之行見金符玉節爲國家宣力四方其智
名勇功未可限量然而論山水之樂則或視今茲有間
矣君自言官溫處久樂其政簡而民樸每當風日晴和
簿書多暇春之日菜花黃秋之日楓葉赤或命巾車或
棹輕舟角巾野服與僚佐數人倘佯於山巔水涯酒村
魚市於是斑白之叟羈貫之童相與迎拜曰吾公來矣
有瀾茗進者有擷園蔬野簌獻者君笑而受之解杖頭

錢以犒之俄而夕陽在山炊煙四起乃相與披襟岸幘
吟風弄月而歸樂哉游乎雖山公之游習家池歐陽子
之在醉翁亭不是過矣余前年五十生日有詩五章偶
爲君誦之而君今歲亦行年五十乃和余詩卽以自壽
其詩有云賓朋爭欲投佳句父老渾忘是長官誦此詩
也不獨見君之風流文采而其政平訟理流慶於人亦
可想見矣余山中人不與聞世間事君之惠政不能具
言而惟借且園一夕之談爲君發一笑之樂君本由刑
部郎外擢異時天子思君治行或擢君刑部侍郎
如高公故事豈非且園中一佳話乎

其二 爲潘芸臺太守作

溫處在漢初爲東甌國其地襟山而帶海距省會絕遠
島嶼縣邈林麓黝儼礧礧乎數州之間 國家建置郡
縣而統以兵備道俾宣布 朝廷威德於山陬海澨閒
專方面之寄而分牧伯之任蓋視諸路尤重哉今觀察
子穎方公於同治三年由刑部郎中京察一等 特簡
斯任凡權關防海諸大政咸屬焉公旣下車以溫爲濱
海劇郡環異叢育商賈駢坐潮波汨起迴復萬里羣盜
出沒其中長鯨修鯢往往而有乃躬自巡歷講求方略
仿古飛雲蓋海之制增製龍舳快蟹諸船馭以習流之

卒督以下瀕之將輕舠巨艦連舳接艦金鼓所震嶼淵
闐如大盜數百先後授首閭閻安堵闔閭填溢水浮陸
行四澳來暨永嘉一縣古巖邑也含溪懷谷岡巒糾紛
曰西溪曰楠溪乃莽賁之野昧莫之壻爲萑蒲淵藪由
來舊矣公募勁卒親駐要隘禽姦莩猾兩溪肅清行旅
歌於涂農夫舞於野荀子曰善附民者善用兵公其有
焉公又以祁祁生徒未知嚮學也謀益書院膏火之資
出俸錢爲之倡廣招秀艾挾冊負素諷誦其中以時習
之月則有試公又以屢縷之卑貧無以自存也乃卽舊
有養濟院墮而大之築房井堰罔不胥飾矜孤頤老晉

匡以生孔子曰善爲吏者樹德公其有焉退食之暇無他嗜好惟耽圖籍手自讎定黃墨精謹膳帙充積數逾萬卷署有且園康熙中司寇高公其佩所建也館宇清華竹木幽邃閱歲已久小有撓廩公稍稍葺治之披襟岝嶼坐嘯於風亭月榭之間與達者數子雅歌投壺悠然自得所謂居官無官官之事處事無事事之心者乎性又愛山水雖居冠蓋不廢登臨如溫之雁蕩仙巖處之南明仙都皆浙東勝地風谷雲谿秀甲天下公於暇日命駕往游或臨流賦詩或摩厓作書仰矚俯映流連忘返林徒雲客詫爲神仙中人於是溫處二郡之人旣

安公之政教又慕其風化神君慈母之稱徧於一道若廉州之謳顏有道澶州之誦韓大中也有雅知公者作而言曰此知其細未知其鉅但知其造福於溫處之一隅未知其有功於中興之大局也昔唐建中貞元間宗社危而復安一時名將若李晟渾瑊馬燧諸人皆號定難功臣而後世尙論之士往往歸功於陸贄當涇師之變事出倉卒贄從幸奉天遠近調發奏請報下書詔日數百皆周盡事理衍繹熟復人人皆曉旁吏承寫不及興元赦令下人心大悅李抱貞入朝言山東宣布赦書士卒皆感泣人情如此知賊不足平也以是而言李

禮文續三
晟馬燧諸將血戰之功不如陸宣公一內相之力矣咸豐間公以刑部主事值樞垣文廟之狩熱河也公簪筆隨扈軍書旁午千緒萬端倚馬視草筆不及凍每有大政樞邸輒與密議公勸以久任宿將優容言官以故臺諫竭忠將士効命禦寇鑿齒之倫以次翦除衝棚息而輜軒騁威械藏而俎豆布乾清坤夷天下光融議者以曾文正公及合肥相國並稱曾李以配唐之李郭而不知居中當局以房謀而兼杜斷是攝是贊成此巍巍之功則公一人之力爲多然則公其今之陸宣公乎宣公遭德宗昏闇不能竟其用方今朝廷清明

天子神聖有殷宗中興之則有成周隆平之制公歎歷中外如日之升異時樹六纛總十連繫天下之輕重豈止溫處之民仰澤懷風想望德音乎歲在橫艾涪灘則壯之月爲公五十縣弧之辰某忝守括蒼叨隸宇下敬獻此言以侑壽觴詩曰樂只君子德音不已此溫處之民所私祝者也傳曰觸石而出膚寸而合不崇朝而徧雨乎天下此海內賢士大夫所共望於公者非溫處所得私也
皇帝大婚禮成仰式乾文
同治紀元之十有一年

俯憲坤典延期流祚普記無私乃發德音降九璽書
凡天下婦人年七十以上者咸與恩賜而吳母胡太恭
人適於是歲十有一月稱七十眉壽之觴鄉人士君子
相與言曰方今聖上家環海而子蒸黎惠浸萌生
仁霑葭葦推娥臺妣幄之恩引年曠典及於門內雖捲
樞桑戶得被大賚况華鎮大樹受加命之服金齒鐵牙
衍宜家之壽而珍禕懿鑠之行溢於壺史其可無一言
以侑春酒介兕觥乎惟太恭人生安定之門嫻習詩禮
事父母以孝聞年二十有一歸贈中憲樂亭君爲繼室
琴瑟靜好十有六年其始來歸也君舅遠宦巴蜀不得

親執棗栗之摯每感卜子之言曰古之嫁者不及舅姑
謂之不幸若節春秋營魚菽之祭必豐必潔節羹則粥
罔不矜飾數十年如一日也贈公始官七閩繼仕三秦
宦轍所至魚軒必偕是攝是贊吏民頌內助焉及贈公
捐館舍於秦安服用無副筭餘一縑太恭人百計經營
始得奉旅櫬歸先兆維時前室子仁山竹平兩君皆未
成立所生子友麓大令年甫十有二太恭人撫之有尸
鳩均平之德積紡績所蓄具摯幣腴修脯聘名師禮賢
者命諸子從之游蚤暮敦慎使讀先人書且而受業夕
必自鉤稽之訓之曰汝家自黃葉老人以至汝父居家

爲孝子居鄉爲良士居官爲循吏吾見世之人有薄其
兄若弟而不恤者焉有多取其先人之貲田而不知讓
者焉有篤於聲色而不顧父母之養者焉有役役於貨
財而沒齒不饜者焉之數者吾家無一也汝曾承其遺
澤可不勉乎諸子稟承慈訓爭自琢磨友麓壯歲有聲
庠序閒視科第如拾芥會遭庚申之亂奉母避兵滬濱
大府聞其名聘居戎幕今合肥相國屢上其功奏加運
同銜以同知直隸州用補常州府陽湖縣知縣江蘇自
收復後戶藉田結混淆無別吳縣地尤大閤丁匿口愈
治愈勞上游知友麓才使推勾之數月而已簿注釐然

如示之掌此可知其賢且能矣他日雙旌五馬臨球大

郡太恭人康強逢吉由八九十而至期頤黃髮垂肩曾

元繞膝 天子方敬奉 兩宮用孝治天下恩

從祥風翔德與和氣游太恭人以名門之壽母爲 熙

朝之人瑞其必有馮親荀母之褒金尊玉杖之賜曼齡

駢福垂曜億齡然則此日所陳其猶嚆矢乎

杜筱舫觀察六十壽序

端蒙內漢之歲余見今相國合肥公於金陵合肥公曰
子見觀察杜君乎余曰未也合肥公曰是賢而才且工
文辭宜往見乃投刺於其行館適君他出門者辭焉已

而君來余舟一見如舊相識其明日以巨帙來發而讀之君所著古謠諺也舟窗無事日讀一卷歎其取材之富體例之精合肥公所謂工文辭者洵不虛矣未幾君權蘇藩又攝臬事余寓吳下過從益熟又有以信君之賢而且才非徒文辭之工也越十年太歲在闕逢闕茂值君六十攬揆之辰鄉人士君子皆言於余曰子熟於君而又工於文宜以文爲君壽余謝曰熟於君則信矣工於文則未也夫文之不工而徒以縛旨繁文星稠綺合爲瓌璋連珠之辭豈切人不媚之義乎然則余將何以壽君無已請卽爲君歌古謠諺自來名人魁士其生

也必有所自來如東坡前身爲五戒王梅溪前身爲嚴闍黎往籍所載非盡虛罔君之生也其大父夢老僧擔簞入室殆杜少陵所謂釋迦抱送者乎故生而穎悟神識湛然請誦古謠諺曰少達妙理叟居士古之名流多有法學識之定國聲光漢臺元常文惠績映魏闕君始舞象勺卽治申韓家言弱冠之歲受任明府聘三閱月而手治大獄七十有三唐張文瓘於旬日間決疑事四百餘事君殆庶幾矣故雖在幕府而具文武幹用隱然負公輔才請爲誦古謠諺曰令德日新裴鏡民 國朝承平日久地大物博至道光之季羣盜萌芽始爲封豕

長蛇以薦食我黎庶楚督東巖裕公整旅討賊檄君從
行始治文牘供資糧屏履既而從方伯夏公旗旛首塗
玉桴金鐸隨流而攘自楚南至於粵西所經如芙蓉之
江銅鼓之山皆苗獠尙寨風土詭異君金鼓鐵馬之間
不廢嘯詠著有南行北行詩各一卷南征傳奇四卷所
謂上馬殺賊下馬草露布君兼之矣請誦古謠諺曰有
文有武是曲大有謀有勇是吳大自是厥後軍事孔亟
朝廷命將出師東屠西剪君輒參豫其間袁浦之陷
也以海船駐守清江姑蘇之陷也以民兵保衛江北暨
乎江浙肅清東南底定諸大師論功於 朝謂君才大

心細簡核精詳屢克名城咸資贊畫洵無愧斯語矣請
誦古謠諺曰入粗入細李普濟海王之國謹正禹筭齊
有渠展之鹽燕有遼東之煮由來舊矣 國家歲入鹽
官爲大軍興以來權法弛廢鑄戶疲焉君手定章程一
十四事行於淮北條制得宜時以爲便其梟散之民非
官與牢盆以姦利相市者名捕其十一人置之法積弊
一清貲課充足少府之儲用是饒裕請爲誦古謠諺曰
鹽政奚廢公未逢鹽政奚興逢我公君以明敏之材濟
之以練達大府引重 朝議翕然嘗權江安糧道權江
藩權蘇藩權蘇臬權蘇松太道所至綏撫僑舊鎮靜流

未完殘奮怯皆有條次其陳臬於三吳也值如臯有冤獄君平反之活三人於歐刀之下砧質之上唐書所謂遇徐杜者生君其有杜景儉之風乎請誦古謠諺曰一問得竟臯陶鄧盛東南兵事自咸豐二年賊由永安州走昭平爲燎原之始以迄同治四年盡殲其餘黨於嘉應州而後已首尾十餘年君在戎幕久聞見最真乃手著平定粵寇紀略及江南北大營紀事本末兩書文贍事詳森然起例宏纖巨細鱗羅布列有良史體裁乃其餘事又工爲小令因萬紅友詞律宗花間尊前之典型闢嘯餘圖譜之紕繆有功詞學不淺而大輅權輿容有

疏略著詞律校勘記爲紅友彌縫其隙故讀君采香詞二卷格律精嚴合於紫霞翁之作詞五要請誦古謠諺曰曲有誤周郎顧昔范攄自序其雲溪友議引諺曰街談巷議倏有裨於王化君所輯古謠諺亦古太史陳詩之遺意也余所徵引皆本是書以君所輯爲君歌之可以欣然而進一觴矣君雖年登耳順精神淵著器宇端凝望其風采似四五十歲人而峻級清階已至方伯他日回豐貂以步文昌聳高蟬而趨武帳華鼓朱節宏總上流智名勇功豈在杜征南下乎勛位愈崇年德彌劭自七八十以至期頤仰承 天子靈壽杖之賜而俯

三
瞻海內士大夫鶴南飛之曲祥圖瑞史焜耀無窮余又
將何以壽君哉請仍爲君誦古謠諺曰且貴且富有南
山之壽

袁母郭太夫人百歲壽序

昔在咸豐紀元之十載恭逢
文宗顯皇帝三旬
萬壽乃加 恩於大臣之耆壽俊在厥服者而及其父
母維時故漕運總督袁端敏公之母郭太夫人行年八
十有四矣有 詔存問 御書懿架頤齡四字賜其家
海內稱述以爲至榮逾十有三載太夫人年九十有七
準故事計閏月爲百歲河南巡撫以聞 詔曰年屆百

齡精神強固洵是熙朝人瑞下禮部旌賞如例於是文
孫筱隲詹事移書中外知交具事實徵詩文禮曰古者
有吉事則樂與賢者歡成之其斯之謂與海內士大夫
善頌善禱比物荃蓀連類龍鸞喬喬皇皇極天下之大
觀懋與詹事同歲成進士誼不能無言而聞見偏僿文
辭儉僿又不知所以爲言乃竊從

文廟御書懿

顯皇

架頤齡四字敬釋其義而憬然曰至乎哉 帝之與天合靈符先天而天弗違也在禮百歲日期頤

然則太夫人之年登百歲 顯皇帝知之矣故以

頤齡二字錫之也古人多大年往往有至百歲以上者

傳稱召公百八十歲殷高宗周穆王皆百三四十歲而自百年以上不更爲之名則皆以期頤統之亦猶自始生至十九皆曰幼也百年者壽之大齊太夫人已符其數過此以往二十年而甲子再周又二十年而古稀再屆進而上之至百八十歲爲巾幗中之召公安神閨房飲食頤頤無不可以頤齡稱也雖然頤齡由於懿榘太夫人之頤齡信有徵矣其懿榘可得聞歟曰太夫人在母氏也年未十齡值歲大無卽能佐家人煮糜鬻紉衣繻以施貧者及歸贈光祿公事尊章以孝處築里以和御臧甬以寬而有制待鄰里鄉黨以仁道光二十六

年中州大旱端敏公時官京師太夫人命出白金千兩爲之倡於是鄉人士君子官京師者咸效之得金萬由戶部下河南奏庶艱食鮮食同鄉官之醪金助本籍賑自此始也咸豐六年項城大饑族有不能舉火者五十餘家月饋之粟又煮粥於路待餓者而食之人一孟荀子云美意延年茲非太夫人頤齡之所自致乎雖然懿則懿矣猶非其槩之大者太夫人之落落大節則在視國事如家事勉其子若孫以移孝作忠而爲中興大局之所攸賴咸豐間羣盜磐牙遠者自五嶺外近者自兩河間所在蠡起端敏公佩使者印督師於皖太夫人

廌書戒勉甚切公嘗乞假歸省太夫人惟問軍中疾苦
剗撫次第不及其他歲在丙辰太夫人年八十矣設輓
之日以軍事孔亟戒勿稱觴以書諭端敏公曰聞捷音
勝聞祝嘏也端敏公念 天子憂勤之意又感慈母
之拳拳景思內昭英風外發龍驤鳳矯掃清逋殘俘其
名賊克其崇墉臨淮鳳陽以次收復太夫人又以所居
項城當蒙亳西面皖北之賊出入恆於斯命諸子諸孫
用搏力之法捍禦鄉里郭其野以守鼓其民以戰每寇
至諸孫年十五以上能執干戈者咸列睥睨閒賊往往
劔而去用是寇在其垣耕穫無廢縣歷年歲元氣不傷

中州者畿輔之門戶也中州安而畿輔亦安功在一方
事關大局太夫人之懿築茲爲尤矣筱塢以詞臣起家
累參軍事又奉 詔駐關中治西征糧食資糧扉履無
闕於供士馬飽騰秦隴底定自茲以往滅烽卧鼓九服
清怡使粒食之民粲也晏也享泰和之福太夫人教忠
之意至是而大慰矣惟 文宗顯皇帝至誠如神
以太夫人之懿築亦太夫人之頤齡用是有懿築頤齡
之賜太夫人善承 天貺俟福貞貞未可限量范望
之注太元曰古者天子世孝天瑞之鼎諸侯世孝天子
鑄鼎以賜之 今天子敬奉 兩宮皇太后瑀

輿彩仗祇詣慈宮蒸蒸至孝洞三光而貫九幽鈞鈐明
延嘉生受天之瑞昭昭矣太夫人生舒長之日登期頤
之壽彼鳴疏聞於 朝乞歸爲太夫人壽是合於古者
諸侯世孝天子賜鼎之禮懋故舉懿榘頤齡四字敬釋
其義而敷陳之他日鑄爲鼎鐘紀 恩榮而蘄眉壽
其有取乎斯義歟

其二

爲衛靜瀾廉訪作

同治建元之十有三載爲

聖天子親政後初屆元

日令辰是歲恭逢

慈禧端佑康頤皇太后四旬

萬壽爰乃渙汗大號首親親次賢賢綍儀旣登鴻釐大

來維時鈞鈐明延嘉生蒼鳥見而海內士大夫家亦往

往有眉黎之壽母其達於

朝聽特加異數者二人一

爲李大司空母姚氏一卽太夫人也李母年逾八秩而

太夫人則行年滿百尤爲曠古所希聞而當代所僅見

此

聖天子睿感通寰孝思浹宙之徵而亦

兩宮皇太后泰元神筴永永無極之符應也於是河南

巡撫上言宜加優禮用彰人瑞

帝曰俞哉其應得

賞賚之典禮部以聞特賜

御書額一方以介大年

示優寵禮也先是咸豐十年太夫人年八十有四

文廟御書懿榘頤齡四字賜其家及同治六年復以

壽逾九旬

今天子賜以御書彤管揚輝四字至是

天章三錫昭回雲漢四方士仁游鳴珂之里登書錦之堂莫不黎收而拜曰楊子有云金齒鐵牙壽考宜家其太夫人之謂乎雖然嘗聞徐幹中論之論壽矣有王澤之壽有聲聞之壽有行仁之壽太夫人遭逢

聖世吟德懷和其王澤之壽優渥若此寶書文冊錫自天府善頌善禱徧於藝林其聲聞之壽彪炳若彼蓋亦窺其致此之原而推其所謂行仁之壽乎榮光幸同鄉里竊聞其略敬爲諸君子揚挖而陳之方太夫人在母氏也值歲大無時年未十歲卽佐家人煮糜鬻縫

衣襦爲濟貧事其來歸也事君舅君姑以孝處先後宛若以和及贈光祿公捐館舍諸孤稚幼太夫人朝夕恣漠之曰爾父讀書未竟其志而歿爾等不能承先志是不子也於是豐摯幣腴脩脯聘名師禮賢者命諸子從之游晚自塾歸篝燈自課之閉廬精誦丙夜未休諸子稟承慈訓朝益暮習枕經藉書方在庠序閒已蔚然爲遠近師表矣道光初河決大梁長君松農公以校官奉檄莅版築事露立風雨中晝夜不息或勸少休曰毋避勞苦吾母教也三子相友公爲禹州訓導以身爲教士民景從寇至佐有司捍禦危城咸倚爲重後卒於官巷

哭罷市謳思弗衰蓋亦母教也若夫德業事功震鐸今古海內戶知之者實惟端敏公太夫人次子也方居臺諫時直聲動天下曾被詔詰問公颺言於朝稱不敢負老母然則陶歐偉望實有自來已上達九重清聽矣洪惟我國家建立四維中參成位承平既久理大物博至咸豐間羣盜萌芽猘窳鑿齒之倫如猬毛而起遠者自五嶼外近者自兩河間趁譚鞞探延易乎常羊之維是時端敏公久居言路執憲轂下臺閣生風蹇諤之誠無媿黠鮑文廟知其忠誠可屬大事命督師皖北太夫人厲書訓之曰兵者凶器不得已而用

之當行以不嗜殺人之心殲厥巨魁脅從罔治則其黨渙散羣盜自平端敏公奉太夫人教弗迓克奔蘇刃者死順刃者生以故動如雷電發如風雨莫當其前莫蓋其後旗旛首塗郊壘疊卷向之羈賊羸裔爲蜚虻巨雄者至是皆睽瞿奔觸禽僵而獸斃露布上陳璽書褒美真拜公漕運總督欽差大臣論者謂禽姦莩猾稟於廟謨者遠也義征仁育得之慈教者深也厥後端敏公扼守臨淮當南北要衝忠誠慷慨在險彌亮貴謀賤戰與賊相持食少事煩鞠恭盡瘁太夫人以國步之孔艱也戎事之未集也上念天子宵旰之

憂勤下念端敏未竟之志日以成父志報國恩爲諸
孫勛筱鵬同年起家詞林以禁中頗牧出而宣力四方
先後參李肅毅伯左恪靖伯軍事旋奉命治關中軍
餉秦黔底定厥功偉焉自茲以往乾亨坤慶九服清怡
丹冥投鋒青徼釋警定三革而偃五兵驅一世之民躋
之仁壽之域以副朝廷之隆遇而慰端敏之遺意太
夫人於此可以欣然進一觴矣其生平辭隆從窳嗇於
自奉惟以利物濟人爲事寒者衣之饑者食之病者藥
之物故者楛之陰行其德不可更僕數而落落大者則
有二端道光甲辰之歲黃流溢於中牟波及於項城民

用蕩析離居不違啓處端敏公時官京師太夫人命出
白金二千兩爲之倡於是鄉人士君子官京師者畢出
金得金萬由戶部下河南助民粒食遠近慕義傳爲美
談嗣後各行省有偏災同鄉京官醵金以賑自太夫人
始此一事也非直鄉里之福天下郡國徧受其賜檀弓
物始君子美之是爲一大端項居蒙毫之西皖之賊出
於斯入於斯無定蹤太夫人命四子惺軒公及諸孫受
臣司馬篤臣觀察團民兵築保城人爲戰家爲守每遇
警諸孫年十五以上能執兵者咸登陴與邱民同甘苦
故被賊雖久而民間耕鑿無廢且拒賊蹤使不得大逞

草薙禽獮卒歸於盡兩河安而畿輔亦安矣此一事也雖功在梓桑而有關全局是爲一大端其他珍禕懿鏢之行不可勝書宜其曼齡綉福神明不衰靈貺畢甄家門鼎盛有孫十人曾孫十有二人太夫人扶靈壽之杖被只孫之服課孫會讀書與曩時課諸子無異後福貞貞未可限量由百歲而甲子兩周古稀再屆其仰承

兩宮皇太后之慈福而被

天子之龍光者行

見祥圖瑞史大書特書不一書又豈止期頤之慶而已乎王充曰太平之世多長壽此太夫人之遭於時者也楊子雲論壽曰物以其性人以其仁此太夫人之修於

身者也榮光服官吳下不得舂鞬登堂奉觴稱賤子上市壽而敬獻此一言以侑春酒雖詞旨淺薄未足掄揚盛美然以 熙朝盛瑞歸本於 聖天子以孝治天下之效海內士大夫當以爲知言也

趙母蔣太恭人八十壽序

同治建元之十有二載

天子方敬奉

兩宮

皇太后瑯輿彩仗鳴玉慈庭於是鉤鈐明蒼鳥見海內士大夫家亦往往有眉壽之母殆所謂睿感通寰孝思浹宙者乎同時徵文於樾以壽其親者二家一爲袁筱鵬詹事之祖母郭太夫人其一卽太恭人也袁母年屆

百齡詹事以聞於天子得褒揚之盛典而太恭人則五代一堂準功令亦在慶賞之例哲嗣兩田大令方宦吳下敬請於大中丞上其事於朝璽書褒美恩禮有加然則此兩家之壽母皆眇有倫比非尋常眉黎耄齡者儔也或謂袁母以端敏爲之子詹事爲之孫顯庸光大似視太恭人爲優樾竊謂是非可以優劣論者夫華釵寶鏡外觀之耀也金友玉昆人倫之盛也袁母雖享大年而端敏諸昆弟已不獲侍盤匱之側矣太恭人所生三子長卽兩田次爲某甫別駕三爲某甫貳尹並以通材偉識馳譽當時有長離鸞鴛鷓鴣之目今者

不遠千里屆期畢集筵鞞膾奉觴上壽豈非吉祥之善事門庭之至榮以視袁母豈有惡歟樾厲吳下得交於兩田因得備聞太恭人之懿行而後歎天之降福非偶然也太恭人之歸贈中憲公年甫十有九前室生丈夫子三長次皆前卒三爲式如少府亦未成立太恭人法鳴鳩均平之德撫之如己出有梓潼季姜之風幼則束以禮義長則訓以詩書諸子率教戚黨稱賢贈公爲山陰名諸生一鬢之俊也試於鄉者二十有二次文章爾雅屢與舉元薦凱之數而沈玉淪珠卒未一登天府家居以文學教授戶外屢滿四方秀艾挾冊負素諷誦

相摩注弟子籍者數百人其門下諸生多掇巍科躋顯仕而鐘跡銷聲角巾終老唐人所云弟子已折桂先生猶灌園其斯之謂歟太恭人淑慎其躬不以窮通得喪幾微見顏面其接物也平以和其治家也嚴以整性又好施與樂善不倦用上以佐成夫子之名下以垂裕後昆雲搏水擊鬱爲鼎門非德厚慶鍾安能致此今式如雖已下世而膝下子若孫森然玉立且有曾孫於太恭人爲元孫此五代同堂之慶所由來也其所生君子女五人皆適良奧之家歲時讌集中外孫曾瑤環瑜珥畢集於前太恭人顧而樂之欣然忘老今歲四月二十

有九日爲八秩設悅之期兩田與諸弟諸子各自其游宦之所乞假而歸歸則設毳毼布襪瑜陳六曲連環之屏張九光雙花之鏡重樓疏堂爛焉如錦又爲魚麗之優兩晝夜以娛賓客所謂能竭其力者諸君有焉且聞是日承太恭人教止用蔬食不事牲殺伊蒲之饌既潔且精楚桂胡鹽以芼芳卉齏醕麥豉具有式法不啻游護世之城而飫郇公之庖也楊子雲之論壽曰物以其性人以其仁夫以大恭人之懿行重之以仁愛宜乎年已大耋神明不衰由九十以至期頤殆可操券他日繼袁母而以百齡達天聽者必太恭人也

辭觀唐中丞六十壽序

為應敬齋同年作

昔在咸豐之季大盜為封狐雄虺以薦食我黎苗窟於金陵蔓於天下維蘇維杭終受其毒而卒藉海上一彈丸之地旋乾轉坤繳大風而誅窳窳於是中興諸巨公勒功於景鐘紀名於庸器龍驤麟振論者比之唐之李郭而寶時淵乎深思竊不禁憬然於我大中丞觀唐辭公也方癸丑之歲公猶以前金山令需次吳中以籌餉為向忠武公所器蒙
文廟特恩越次而遷五馬適撫軍吉勇烈公駐軍上海聞公之名貽書向公求之向公未許也公曰上海為海口門戶無上海是無門戶

也力請於向公率川勇千有五百赴滬蓋公之深識遠慮固知滬上一隅有關東南全局矣既至滬適有小警全軍十七營皆潰公所部三營堅壁不動吉公按視歎曰兵不在多在將得人耳事聞旋拜松江太守之命公之受
主知膺大任實基始於此已而蘇有潮勇之已汰者踞城外恣淫掠有司不能戢大吏知公才檄攝蘇州府事受事未二旬值中秋潛軍往捕之禽薙無遺蘇人始得安枕卧至今三吳父老謳吟弗衰亦猶松江之人嘖嘖於公之單騎犒師也初公守松江值上海諸軍凱撤薄城下而過民情洵洵咸登陴軍譁且怒公

單騎出慰諭之始按隊去松江人繪圖紀其事是謂單騎犒師云嗣是之後由太守而觀察而廉訪而方伯

特加巡撫銜勦理五口通商之事豐功偉績不可勝書乃至庚申夏而金陵大營告潰矣公方駐上海議外國互市事旋奉命遷巡撫權總督并攝

欽差

大臣當是時賊欲熾甚全局已土崩瓦解不可收拾賊以二十萬眾攻上海志必克城中羸卒無多不任戰居民逃亡城爲之空或勸移駐江北公怒曰上海爲海口門戶無上海是無門戶也誓與城俱存亡固守七晝夜賊始解去嗟乎使當日公一動足則上海必陷於賊上

海陷於賊而軍餉無出文報不通從此蘇杭遂成絕域異日者雖有方叔名虎之臣李廣程不識之將其何所託始以廓清江浙奏

中興之第一功哉此寶時

所以淵乎深思而憬然於我公也旣而謝巡撫事專治通商於壬戌之春奉

命入都

兩宮召見

慰勞有加

特命署禮部左侍郎旋授工部右侍

郎充總理各國大臣公由縣令起家十年之間外至督撫內至卿貳聳高蟬而趨武帳回豐貂而步文昌遭際之盛千載一時俄而引疾歸旋抗陳情之疏角巾野服蕭然自得消搖乎桑梓之間倘徉於伏臘之會或經歲

不入城市而鄉里善舉悉躬倡之訓諸子曰儉刻二字
所宜明辨處已宜儉待人戒刻諸公子各能稟承家學
有聞於時綴組雲臺影纓天閣海內榮之寶時事公久
承公知遇最深當官軍收復松江時列名薦牘遷直隸
州收綴翠羽於冠至今戴德焉今歲爲公六十攬揆之
辰不敢以常詞爲壽輒述公之治績有關於
聖朝中興之大局者爲公侑一觴想海內知言之士必不
河漢斯言也

蒯子範太子六十壽序

同治十有三年 天子親政既逾歲益習於庶事方

諮民瘼課吏治以應中興景運適有客自蜀來以夔州
太守子範觀察政績徵求詩文余得而讀之歎曰昔人
有言得一良令則百里之民安得一良守則千里之民
悅君之治行無愧龔黃 天子或法漢廷故事增秩
賜金璽書褒美公卿有缺卽以補之君其首選乎夫夔
之相去遠矣君所以治夔者余雖聞其略未得其詳然
吳固君之舊治也而余則吳下之賓氓也方君宰長洲
守蘇州余皆厲吳雖杜門息轍不與聞外事然言君之
善政者旦暮溢吾耳市之人告曰倅寇散卒驛騷於衢
君執而戮之矣野之人告曰驛路艱危君平治之矣橋

梁撓傾君營建之矣河渠壅塞君疏濬之矣庠之人告曰先賢之祠墓已繕完生徒之講舍已修葺凡名流之故蹟及匹夫匹婦義烈之遺風流韻已表彰矣南畝之人告曰吾儕小人輸粟於倉向苦不足今有贏餘負而歸矣縉紳之徒告曰某某之獄糾繚數十年今片言而決矣某也某也以冤獄株連今扶老攜幼而歸矣某也非官與牢盆而擅鹽官之利捕之急則白刃見今竿其首於郊矣履縷之氓告曰吾無食官與吾粟也吾無衣官與吾帛也窮巷之婦女告曰吾無夫無所依官設清節堂吾往依之也吾有子未出痘官設牛痘局吾往就

之求種痘也噫君之善政何其眾歟亦有謗者曰吾邑納糧舊有大小戶之別小戶重而大戶輕由來久矣今乃一之何也識者曰此君之持正也考之周禮雖有士田之名然在近郊之地同出什一之稅豈當有別乎又有謗者曰自來言道學者其居官所在必首禁妓今未聞焉何也識者曰此君之通達也昔齊高帝以建康居民錯雜多姦盜欲立符伍王儉諫曰謝安所謂不爾何以爲京師也深識宏論豈一孔之儒所能識乎君以明敏之才重之以練達故相國曾文正公及今合肥相國倚君如左右手於是輿誦騰於野薦剡交於朝其入

覲也羣公動容公天語褒寵名對後六日卽拜夔
州太守之命中外驚詫以爲殊遇昔漢丙吉與魏相書
曰朝廷已知弱翁治行方且大用其是之謂乎君之治
夔雖道遠不能悉知然聞其創設書院修築隄岍積儲
米穀勸課蠶桑則知其治夔也猶之治吳也余與令弟
蔗農觀察甲辰之歲同舉於鄉故在吳下得時相過從
旣至夔猶時有書問往來今歲之春寄所刊帶耕堂時
文二冊理法清真格律適上猶見先正典型又寄判語
一冊則皆昔年爲牧令時據情定斷援筆直書者也青
錢學士龍筋鳳髓有此典雅無此儁永余爲弁言勸付

剗剗蓋雖山川悠遠而文字之交固不隔也歲之九月
爲君六十稱慶之辰同鄉沈義民明府亦甲辰同年也
向辱君知遇最厚因與余議所以爲壽者余曰君子贈
人以言舍文字何以壽君哉且徵求詩文固君之雅意
也余爲小文子其書之郵寄蜀中以明吾兩人拳拳之
意無日不在白鹽赤甲間亦猶君之不能忘吳中舊雨
也夫以君之治行而又值聖天子旰食宵衣勤求
上理必將一歲九遷其官由觀察而陳臬開藩爲期非
遠他日金符玉節重莅三吳余以吳下寄奴再陪觴詠
其以君善政來告者必日益衆矣自七八十以至期頤

余之所以壽君者當更有進義民其執筆以待可也
金詹生廉訪六十壽序

去歲爲詹生金君六十生辰余思爲小文以壽之而因循未果但和君晚菊詩四章聊脩一卮而已今年正月君來吳下出一巨編見示則皆海內士大夫以文壽君者也余受而讀之笑曰禮有之多文以爲富君可謂富矣雖然未足以盡君也諸君子之言雖皆臚列君一生行事然謂君長於治禹莢則唐之劉晏優爲之矣謂君長於治河渠則漢之賈讓優爲之矣謂君長於治軍饒則西漢之蕭何東漢之寇恂優爲之矣安見君之空前

而絕後哉然則將何以壽君曰余聞君今歲將至滬濱創設同倫書院此黃帝以來所絕無之事意當時若風后力牧之徒尙未足以辦此其大於前三事非止倍蓰而已君嘗與余言其略同倫講院分十二門若經學若史學若天文若地理若性理若典章下而至於詩賦時文無不延訪名師分門教授而於東洋西洋諸大國中擇其秀穎之士使之自行束脩謁吾徒而來請讀中國之書焉受中國之業焉烏呼豈非黃帝以來所絕無之事乎考之紀載神農以上有大九州然則今所謂歐羅巴利末亞諸洲神農以前固與吾中國通者也黃帝以

來不能及遠乃就一州之中畫爲九州而治之此外存而弗論雖堯舜之聖所治者冠帶之倫而已乃至今日而海外之州復與吾通飈輪往來視道若咫中國士夫見所未見棄所學而師之孔子曰學在四夷此固不足爲中國之辱雖然孟子不云乎吾聞出幽谷而遷喬木者未聞下喬木而入幽谷者也夫風會所開聖人不能止則與其化我而爲彼曷若化彼而爲我哉子思子作中庸論至聖之聲名施及蠻貊推之舟車所至人力所通日月所照霜露所隊凡有血氣莫不尊親竊謂自今以往更數百年必將如子思之言而未始非君同倫講

院之設有以發其端造物者必將永君之年以成君之志然則君之尙壽無有害卽於此舉操其券矣

張少渠五十壽序

予嘗署所居曰讀先秦兩漢書室蓋漢人之書予皆喜讀之而獨不喜讀王充之論衡以爲有大謬於聖人者其書有福虛之篇大旨謂世人以受福佑爲行善所致實則遭遇使然耳嗟夫福善禍淫聖人之所以爲教也餘慶餘殃之說著於周易天人相應之理備於春秋充之立言如此豈其然乎豈其然乎張子少渠樂善不倦之君子也其婦爲余外姊之女在余婦則爲女兒之女

故相習也嘗有術者爲少渠推算行年謂曰四十有九當有大厄恆惴惴焉是歲適奉檄與於海運之役凡從事海運者必至滬濱附火輪船以行有輪船曰福星者行有日矣江蘇海運局之官附是船者二十餘人少渠初亦預焉忽有一輪船先福星二日而首塗少渠乃捨而就之同釋之友咸慘其祛竟不爲畱問其故不能言焉旣行而風逆船遲於二十四日解維二十九日始抵丁沽至三月六日卽其生日矣少渠之姊婿姚訪梅觀察官津門以其符大衍虛一之數潔尊爲壽有來告者曰福星輪船於二月廿二日沒於海矣一坐皆驚訪梅

乃手一樽以進曰始吾以此酒爲君壽今敢以此酒爲君賀也天佑善人固如是哉少渠南歸爲余述其事余笑謂之曰子不福星子眞福星矣至今歲少渠年五十矣凡在親串例以詩文爲壽余亦不能不循世俗之禮因卽書此言以詒之旣使世人知天道福善之不爽用以折王充福虛之說而又勉少渠益勛於善將見自五十而至期頤受福更無量也

金廉訪夫人師夫人六十壽序

嘗讀北門之詩而有喟焉夫旣終窶且貧莫知我艱矣乃并其室中之人而不能相諒交謫也交摧也至女曰

鷄鳴之詩則不然其夫若婦鷄鳴而起弋鳧與雁相與
爲樂有酒肴之宜有琴瑟之好又能以雜佩佐其君子
通殷勤於賢士大夫其夫賢矣其婦亦非常人也三代
下是夫是婦吾見罕矣乃今得之於眉生廉訪與師夫
人廉訪服官三十年免官以來二十餘年其名滿天下
其文章經濟焜燿人間自王公大臣以至兒童走卒無
知不知皆曰眉生先生當代之魁士名人也至夫人則
內言不出知者或尠余辱與廉訪遊又同居浙右故竊
聞其略夫人爲韓城右姓祖若父皆顯宦也生而高賢
姣嬈習禮明詩學琴於胡知珠夫人兼長書畫然其在

室也惟助母氏庀家事不以才藝自多及歸廉訪年二
十一矣以不逮事姑爲恨每誦魯語之辭曰夫婦人學
於舅姑者也事舅如其父遇先後宛若如其女昆弟廉
訪官南河食指數百三黨咸來就之一饌一粥無私焉
下逮臧獲遇之如一門以內皆感而敬之小有不避輒
相戒曰夫人雖不言吾曹能無愧乎庚申之變奉其君
舅渡海避寇闔門百口無一失所者及廉訪以事去官
居患難中夫人陽陽如平常中外依附者仍與同居不
以盛衰而異生平豐於施人嗇於自奉四十年來未嘗
獨裁一帛至今所曳婁者猶嫁時衣也夫人生女子子

復文續五
七人中年卽爲廉訪納筮室得一子子之如己子見者不知非其所出也廉訪負經世大略喜談天下事有王景略陳同甫之風米鹽瑣屑固不甚措意夫人量入爲出防置於豐故常綽然有餘使廉訪無內顧之憂得以縱遊山水徧交海內賢豪長者夫人欣助之益爲甚宏矣當廉訪半野樓落成以詩張之夫人及公子女公子更唱迭和流傳海內一門風雅望若神仙而讀夫人詩夷猶自得有詩人樂道忘饑之意彈琴詠風古之女士也視鷄鳴三章何愧哉異乎北門之詩矣余不才而廉訪頗不鄙棄於蘇於杭詩其觴詠每語余自滬而杭必

取道魏塘當掃徑以待勿以風利不得泊爲辭余敬諾之然則如余者固當在雜佩贈之之列夫人少廉訪二齡今年適當六十曰耆之歲余可無一言爲壽哉敬誦鷄鳴三章爲夫人壽卽以爲廉訪壽因思吾儕久謝軒冕世間榮落頗不以關懷惟名教樂地未肯多讓耳廉訪有此賢內助雖古北門之詩人亦當且羨且妬於干載之上況他人乎其何修而得此廉訪自號六幸翁夫人之賢乃其一大幸也歷數六幸而不及此負夫人之賢矣毛鄭說詩以兕觥爲罰爵余援此例卽借公子輩介壽之兕觥罰廉訪一觥焉

恩竹樵方伯六十壽序

昔孔門分政事文學爲二科然竊謂長於文學者容或不能政事而長於政事者未始不可以兼文學歐陽子言劉柳無稱於事業姚宋不見於文章此亦各從其重者言耳唐宋文人如韓蘇諸大家孰非蓋代名臣卽歐陽子亦豈專以文章見歟寇萊公風節動一世而詩情清麗趙清獻立朝議論侃侃不屈而所爲詩亦諧婉多姿吟風弄月古人不廢爲君援筆賦梅花奚損廣平相業哉竹樵方伯恩公當代之韓蘇也自同治九年由奉天府尹拜蘇藩之命其明年綠駟紺幃莅至胥臺而

樾適爲吳下賓萌承公不我遐棄時相過從始以所著南游集見示誦之清妙絕倫因次集中詩韵奉贈一律是爲酬唱之始嗣後詩筒往返幾無虛日傳牋之使日或再三遂有吳中唱和三集之列傳誦藝林自是以來公有所作必以示樾而樾偶爲詩歌亦必就而正焉文字之交日以加密更唱迭和形跡兩忘溯公莅吳之年與白香山之官蘇州刺史同爲五十四歲至是七易暑寒而公則行年六十矣吳下士大夫與凡吾儕之厲於身者咸思以交爲壽乃皆就樾而謀謂樾固深知公者也雖然樾之與公不過道義相切劘文章相討論至其

稽名勇功高掌遠蹠爲 國家宣力四方者固未得窺
其涯涘卽其藩吳七載中間攝蘇撫者再攝漕督者一
經文緯武造福三吳而樾杜門謝客聞見漏卮亦未能
揚摧而陳之也其將何以壽公哉無已請就公之文章
政蹟兩極其盛者言其大略焉公出蘇垣瓜爾佳氏爲
昭代著姓道光初元公甫四齡己以任子讀中秘書及
歲試列高第釋褐雲司有聲郎署繼而一麾出守典郡
齊魯閒旋由都轉而陳臬於皖是時大盜磐牙所在皆
有公嘗出銳師扼之烏江再戰再勝以視世之嚙哨宿
將亦無媿焉及其綜理儲胥統籌全局危言深論感動

朝聽雖坐是左遷嶽嶽然不爲之動公之節概上媲
古人豈猶夫突梯滑稽脂韋絜楹者乎同治之初蹶而
復起旋有尹京作翊之 命瀋陽爲我 朝豐沛之邑
士信民敦工樸商慤公在任六載政簡刑清遂以大治
天子知其才擢拜蘇藩下車以來民安其政士服其教
僚友稱其仁恕守令感其寬和蓋不務爲察察之政赫
赫之功而務於瘡痍之後彫敝之餘與民休息以復其
元氣史稱謝芳明深達政體闊略苛細又稱王宏斟酌
時宜每存優允公之謂矣政理之暇酷探騷雅發爲詩
歌夏寒玉之清韵揚天葩之奇芬手定其詩十卷曰承

恩堂集詞一卷曰蘊蘭吟館詩餘昌黎有言餘事作詩
人公則以政之餘作詩詩之餘作詞而三者皆能獵微
窮精揮常取特異夫世之野麋蒙象者殆其稟受有獨
優乎楊德祖云銘功景鍾書名竹帛斯自雅量素所畜
也豈與文章相妨害哉觀於公而益信矣至其憲交游
篤風義憐才凌士不殊存歿在京師時與曹良甫觀察
同官相善也及以廉訪使駐合肥又善於徐君蒞庵兩
君皆前卒乃取其遺詩手校付梓俾淪玉沈珠卒顯於
世其用心可謂厚矣楊子曰我心孔碩乃後有鑠公宅
心寬博祥源福緒如日方升今歲之秋將以三年述職

人觀京師 天子知人善任必將有不次之擢封疆節
鉞固在意計中不必以風語華言瀆陳於公之側也惟
樾以江湖孳叟自忘疏賤雲鵬離鷄相與論交七載周
旋亦不異萱之逢杜矣當公六十稱觴之日不敢以常
詞爲俯而惟舉公文章政績之卓然者粗述大端以明
聖門政事文學兩科未始不可合而爲一而歐陽子之
言猶未爲定論也公其听然而一笑乎

其二

爲吳子健中丞作

皇帝御極之三年氣調而時豫均禧於九垓星紀之野
燦如晏如竹樵方伯以三年述職之期拜疏於 朝願

一登文石之陞涉赤墀之塗 優詔許焉先是廉訪勒
君亦請入覲行有日矣元炳乃與制府上言請暫留方
伯以待廉訪之還 制曰可維時斗南中繩九暑乃至
考之管子夏之日君子修游馳以發地氣稽之漢制伏
日不干他事謂之伏閉方流金鑠石之時簿書小簡方
伯既未首塗清簟疏簾綸巾羽扇頤性養壽無廢嘯歌
而是歲太歲在疆梧汭漢距嵩生嶽降之年甲子一周
矣六月乙未按憲書爲聖心守日最吉之辰則方伯生
日也凡在寮案僉謀所以爲壽珠零錦燦華藻雲飛而
屬元炳以一言爲之嗶引楊子云翕其羽朋友助也元

炳幸與同官深得翕羽之助易美金蘭詩詠百朋其敢
以不文辭哉竊嘗淵淵深思自古題期立象之世將模
唐範虞齊烈乎義農必有名宗望姓鼎族高門爲海內
冠冕者晉稱王謝唐稱崔盧世家喬木爲時所重方伯
出蘇垣瓜爾佳氏重侯累將世爲右姓蟬冕交映台衮
相襲斯固 昭代之王謝崔盧也故在勝帶之初己以
任子荷 天之寵及歲與試輒居高等 詔以文職用
內歷爽鳩之職外剖銅虎之符蒙羽之山夾谷之臺隼
旟莅臨不肅而治俄權安徽按察使兩攝藩條兼總儲
胥方是時大盜爲封狐雄虺睽瞿奔觸所在皆是方伯

兩以銳卒勝之烏江。帝用嘉焉，錫以孔鳥之羽，用焜
燿乎其冠蓋，金符玉節，儲以有待矣。方伯峨然守正直，
而不阿無蓬，轉隨衆之心，有赤石不奪之節，懼芻蕘之
不給，感時事之多艱，危言高論，忠憤激發，舉朝動容。海
內想望，雖坐此下，除然光名滿天下矣。同治建元之初，
朝論以方伯文通武達，宜蒙抽擢，俾復雁門之騎，電飛
景拔，高步雲衢，仍由都轉而廉訪，光復其初。方伯寵辱
不驚，道然任運，奪戟還笏，喜愠兩忘。古人之風不可及
也。昭代龍興之地，實惟瀋陽。滄海南迴，混同東注，體
大物博，是曰倍京。方伯拜師尹帝鄉之命，握玉麟符。

者首尾六年，尋三河之舊壤，訪四樓之遺址，登唐宗駐
蹕之山，尊仙人對奕之坪，政簡刑清，觴詠閒作。古稱前
尹赫赫，後尹熙熙，方伯以一身兼之矣。吳會者海內之
名區，東南一大都會也。財賦之盛，甲於天下，非有體國
經野之才，不能班條理務，類若畫一。天子以爲舟大
者任重，馬駿者遠馳，蘇藩之劇，宜得其人。特降璽書，
九命作伯，震華鼓建朱節，雙旌六纛，翩然南來。至則宣
布德意，搜揚人物，完殘奮怯，皆有條理。和調而不緣溪
盜，而不苛政事之暇，輒從魁士名人游，與之更唱迭和。
有古人電掃庭訟，響答詩筒之意，殆所稱化洽行春風。

澄坐嘯者乎中間攝漕督者一攝蘇撫者再威騰乎閩外禮縟乎區中遵五進四務崇寬大元炳承乏於斯每檢故牘所謂舊令尹之政猶可按也方今天子旌賢寶臣知人善任近者獻其明遠者通其聰方伯起金張之族膺柱石之寄稱譽葉語溢於朝聽不次之遷可豫卜矣異日玉露金風商秋應節碧油紅旆恭詣闕廷華林飾館延英召對占周易之三接遵漢法之四見上奏治平之策下陳方俗之宜天子嘉之必將擢居外相宏總上流智名勇功從此其隆隆日上乎元炳忝撫三吳與方伯晨夕過從先趨後息藉以匡其不逮當茲

覽揆之辰奚可無一言以爲壽然而切人不媚信言不美飛蓬之問不在所賓則凡瓊瑋連玆之辭固未足以陳於前矣其何說於處此竊意方伯深於詩者也謹爲誦詩詩曰樂只君子遐不眉壽樂只君子遐不黃耇請以祝延長而祈綽綽又曰樂只君子天子命之樂只君子福祿申之是則躡車乘馬君子來朝湛露彤弓自天申命又可於此徵之也

其三 代作

昭代龍興遼左襲九竅重九勅神合乎太乙一時蕭曹房杜之元臣衛霍韓耿之宿將各樹閎闕傳子孫鼎族

高門軒冕相襲而蘇垣瓜爾佳氏尤爲著姓蓋金之諳
班元之怯薛重侯累將世濟其美古稱金張世族袁楊
鼎貴不能踰也竹樵方伯恩公以名宗望族爲天下甲
門武達文通源淵有自生甫數齡卽以名公孫拜道光
初元 恩詔瑤環瑜珥蘭茁其牙而已以虎門胃子
與青領之生同受上庠謨訓所謂玉映觴辰蘭芬綺歲
者與及歲就試按轡文雅之場環絡藻繪之府高文典
冊揚班之儔羣公嗟歎以高第奏御 詔用京職懷香
握蘭趨翔廊閣依光日月上應列星白雲之司古稱司
憲 國家明刑弼教尤重其選公居郎署執憲詳平參

處法意至析秋豪而雷霆之震仍合仁恕遠邇疑讞平
決攸歸殆所稱張于二氏陳鄩兩族決獄無冤慶昌枝
裔者乎大稽百憲積優成陟 帝用嘉焉乃錫以銅
虎竹使之符俾典大郡初莅沂州禹貢徐州之域古齊
魯莒三國地也登蒙羽之山訪郟費之域宣風展義民
大和會於是依流平進移守濟南夾谷之臺想宣尼之
遺跡伏鄭之祠尊漢儒之故里公之德業從此遠矣煉
玉量珠典司禹莢 朝議旋以爽鳩舊屬俾陳臬於皖
而是時大盜起於粵西絳頭毛面之屬所在有之公兩
以精士練材多力五百利距三千扼之烏江之澣午其

將取其軍若撥糶然古有一日而破十二壘三日而九捷者練迹校名亦無讓焉夫興師十萬日費千金楨幹芻茭魯公申做資糧扉屨陳鄭疲焉公既任儲胥之重感時事之艱自以受國厚恩世家喬木休戚共之不敢以劉勝寒蟬委蛇隨俗讀集中詩有曰萬竈無烟倉無粟戰馬哀嘶僵四足朝發封奏達九重隻手上撼天門哭其意氣忼慷忠義奮發握蛇騎虎不避艱難可以想見矣張蒼左遷汲黯中廢道然任運無失其常同治之初天子有故舊不遺之意仍還公笏殊階榮級視昔有加爰有奉天府尹之命其地爲我朝豐

沛邑長白之山鴨綠之水乃聖清神源福緒之所鍾也風俗敦龐山川雄秀公雍容坐鎮歲稔民和因與二三僚友張銷寒之會攄懷古之情凡永祚之宮薰風之殿覽秀之亭誓師之臺望古遙集逸興遄飛登高而賦固大夫九能之一而其政簡刑清亦可驗矣三吳財賦甲於天下地大物博絃冕所興方牧之寄廟堂重之公九命作伯金符玉節翩然南來莅臨吳會東南當大亂之後民困未蘇公下車以來宣朝廷德意務與父老休養生息不以苛細爲事不以操切求功禁罔闊疏風績清簡中間攝蘇撫者再攝漕督者一曹無

留事神無滯用疏簾清簟不廢嘯歌與吳下諸名流唱
妍酬麗積成篇帙非劉輿長才裴邈清才兼而有之其
能若是乎今歲爲三載述職之期疏請入覲 優詔許
焉九和時節西灝沆碣將以秋請之禮乘朝車詣闕下
嘉謨嘉猷揚扆而陳之 天子素知公才必有不次
之擢馬燧之總十連陶侃之督八州不在指顧間乎其
在大雅曰文王孫子本支百世凡周之士不顯亦世此
周之所以興也及東周之衰吉甫申伯之後皆不克紹
先世之美論者惜焉我 國家重熙累洽浸仁沐義故
家遺俗光藻不渝方雅之族勳賢之里稟仰太和枝附

葉著爵位蟬連台袞相襲公以任子起家而功名之盛
彪炳一時華藻雲飛鬱爲文棟此固閒氣所鍾而益足
以徵 聖朝源遠流長繩繩未艾詩所謂不顯亦世
者可以此觀之也是歲六月其日乙未爲公六十懸弧
之慶凡銅墨下吏仰盛德之光而戴二天之庇者咸願
以一樽爲壽而屬某以文伯之夫支離曼衍之詞金箱
玉笈之記非可陳於大君子之前也敢以野人之嘖言
粗述公文章勳業之盛美而推本所由不特祝公之富
貴壽考媿美汾陽且以卜我 國家之翔襍集嘏薦祉
登祥永永年代麟儀儀而鳳師師建中和之極無疆惟

休也立言之君子儻有取乎

其四

嘗讀南山有臺之詩矣其首章曰南山有臺北山有萊
樂只君子邦家之基樂只君子萬壽無期其詞美其旨
永夫亦可以無加矣乃必衍之而至於五章則不過變
文以協韻而初無加乎首章之意無乃可已而不已歟
曰古人之愛敬其人也言之不足又長言之長言之不
足又從而詠歎淫泆之所以見其愛敬之深而不自知
語之鍾意之複也豈獨南山有臺之詩凡詩人之詞類
然而樾今者之壽竹樵方伯則有合乎詩人之義歲在

疆梧泖漢月在團且其日乙未爲公六旬覽揆之辰樾
旣爲文以壽之又譜長壽仙小詞一闕書齊紈以獻焉
區區之忱所謂善頌而善禱者如祖約之賦終南其意
盡矣而諸君子之宦游於吳者仰下風而望餘光咸欲
以一樽效詩人稱彼兕觥之意而屬樾侑之以文樾笑
曰余旣賦南山有臺之首章矣又將賦其二章乎雖然
古人之愛敬其人也言之不足又長言之長言之不足
又從而詠歎淫泆之則樾之於公雖至再至三詎固不
得而辭夫樾之得交於公交於詩也以文爲壽不如卽
以公之詩爲壽嘗受公全集而讀之矣讀綠筠仙館吟

草春柳秋柳諸作風神絕世想見公三五少年時蘭芬
玉暎王謝佳子弟也讀南鴻小草抒寫胸臆不假塗澤
憶京華之舊游尋歷下之勝迹想見公一麾出守政簡
刑清古之循吏卽詩人也讀臨淮江上錄及壽陽行役
集多卽事感懷之作其時盜賊磐牙東南淪陷公以世
臣受 恩深重故見之歌詠者有杜少陵感時花濺
淚之意如云歲月隨流水干戈通海天又云淮皖幾曾
畱淨土干戈何日解征衣懷抱可見矣讀歸里集及蔬
香小圃集時公以抗言時事 朝議左遷在他人必有
不能釋然者公角巾歸第怡然自得開詠菊之社賦銷

寒之詩春宵花月之吟城東九秋之詠平章風月管領
烟霞幾欲與樂天天隨諸公平分半席若忘前此之金
戈鐵馬爲 國家宣力四方者蓋其智深勇沈蓄之者
愈厚而用之者將愈遠矣讀灤水重游集則公蹶而復
起時所作也有酬李莼客七古一章忠義激發慨然有
攬轡登車澄清四海之志讀嘉禾堂集則公尹奉天時
所作也其地爲我 朝豐沛之邑山川雄秀風俗善良
公坐鎮陪京不勞而理訪四樓之遺蹟經五國之故城
集中所謂簿書餘暇會詩友追蹤元白揚風騷者極一
時文酒讌游之盛焉嗣是爲貞白堂集則公藩蘇以後

之詩而荷芳坐嘯集又奉 命攝漕督在淮上所爲詩也勳業益隆而詩格亦進而日上樾與公交自辛未歲始時公初莅蘇臺行年五十有四與白香山太傅初任蘇州刺史年齒適同至于今茲七易寒暑矣唱和之作別爲一編不入貞白堂集蓋此數歲中詩筒往返無月無之而公所著承恩堂詩集固日在案頭也故承諸君子之屬而卽以公之詩爲稱觴之助斯固樾之善於藏拙哉公承 天子知遇勳名爵位如日方升而詩亦必一官一集有加而無己自七八十以至期頤諸君子苟徵余文樾取之大集清新無窮視南山有臺之詩變文

協韻五章而仍如一章者或轉勝之乎

沈母李氏蔣氏兩夫人壽序

光緒建元之三年

天子方受學綠圖問道柏招

未親庶政

兩宮皇太后內持維外紐綱陶天下

爲一家稽之前史母后臨朝自漢和熹至宋宣仁代有其事然未有 兩宮並聖娥臺妣幄巍巍比崇如

今日者也

天子珥輿彩仗祇詣慈宮尊履蒸蒸

奉承洪業於是鼎大可觴蒼鳥見而延嘉生織女明而鉤鈐耀一時士大夫家咸有壽母之慶所謂喜洽祥流雲蒸川增者歟而書森觀察暨其金友玉昆適爲尊慈

兩太夫人合而稱眉壽之觴蓋兩太夫人者方今之鍾
郝古所稱先後宛若也金罍兕觥同時並舉左篋而右
笙左麟而右鳳此尤聖世之祥

兩宮皇太后曼

福駢齡之兆矣凡獲交於觀察昆仲者莫不披華啓秀
傾液漱芳以將其善頌善禱之意而屬樾以一言爲乘
韋之先緬維先大夫以嘉慶丙子領鄉薦於秀水沈氏
有同歲生二其一爲雪門公同列賢書其一爲蓮溪公
以優行貢成均兩太夫人卽兩公之德配也樾以年家
子姓眷鞠而拜堂下敢以譎陋辭哉竊嘗讀其壺史於
兩太夫人珍禕懿鑠之大者有以得其都較今者惜惜

醞譙酣滑無譁敬請揚扈而陳之惟李太夫人之歸蓮
溪公也公方以名進士官比部京朝官食玉而炊桂自
昔難之太夫人黽敏有無量入爲出上以奉君姑外以
佐夫子秩秩如也蓮溪公出守京江旋移秣陵太夫人
皆從之官馭下以寬持躬以儉內政井然罔不矜飾蓮
溪公無內顧憂循聲大起遷淮徐觀察使者行且大用
矣以病免歸文史自娛優游終老皆太夫人襄助之功
也至蔣太夫人之歸雪門公也公時甫舉於鄉書生門
戶清寒如舊而蔣故素封漿酒藿肉把珠載金太夫人
旣來歸則屏去珍髡躬操井臼有桓少君之風焉雪門

公官樂清教諭儒官清苦惟以琴劍自隨太夫人不從之官家居十餘年施無新衣篋無舊蓄而接遇族姻撫御臧用一以寬厚爲本內外無閒言古稱富而能貧儉而能廣太夫人之謂矣兩太夫人皆能以令德相其夫及其繼也又皆能以懿槩教其子諸子亦能敬承家學雲搏水擊鵲然而起書森觀察嘗爲姑蘇太守有政聲寅甫大令奉檄滬上亦以幹局稱達夫子美兩孝廉於庚午之歲同舉於鄉以天府賢能之書爲竇氏連珠李氏花萼之集士林傳述以爲美談此外三筆六詩外朗內潤酪酥醍醐並有令譽所謂謝有覽舉王有養炬復

見於今矣至于列孫行者二十有四人列曾孫行者十人鷄鳴盥漱咸至寢門幾如郭令公之於羣孫不盡能辨頷之而已其大者崢嶸見頭角今歲有應童子試而冠其軍者觀察公子也兩太夫人之教至是而益遠矣先是李太夫人居京師而蔣太夫人家居初未謀面及中年以後乃始同居里閭歡然如女兄弟已而遭庚申辛酉之亂避居海鹽之澈浦崎嶇轉徙而達申江益相依如左右手蓮溪公始無子以雪門公長子爲子卽書森觀察也故觀察事兩太夫人如一諸子諸孫亦事之如一兩太夫人安神閨房之內優游北堂之上含飴弄

孫頤性養壽樂可知也又皆耽禪悅樂無事清簞疏簾
閒焚香靜坐手牟尼珠口伊蒲饌六鑿之擾不足以滑
和不入於靈府怡然無感體氣和平兩太夫人之由八
九十而期頤爲 熙朝人瑞可於此卜矣今歲五月
爲李太夫人設悅之辰行年七十而蔣太夫人又十年
以長屆八十常珍之歲三月上浣其生日也觀察昆仲
諏八月之吉爲兩太夫人壽是月也金風屆節玉露啓
塗一年景物之美無逾斯時於以祝延長而祈綰綽不
其美歟樾念嘉慶丙子至今六十有二年矣先大夫同
譜之友晨星寥落而兩太夫人康彊逢吉神明不衰且

吾母今歲亦年逾九十矣詩序云南陔者孝子相戒以
養也此非樾與觀察昆仲所當共勉者乎故承諸君子
之屬不敢以辭又不敢以常詞進輒爲誦東廣微南陔
之詩曰馨爾夕膳絜爾晨餐願爲兩太夫人侑一觴更
誦其卒章曰勗增爾虔以介丕祉則又祝兩太夫人祥
源福緒如日方升而觀察昆仲名位亦隆隆日上異日
以一品百齡之兩壽母恭逢 兩宮皇太后萬壽
慶典 聖天子以孝治天下錫類推恩必有靈壽
上尊之賜樾舊史氏也又將執筆而紀其盛矣
樊母余太夫人七十壽序

著雍攝提格之歲方春始和余在吳下曲園冢婦樊請於余曰吾母今歲行年七十矣遠在黔中不克奉春酒介眉壽區區之意冀得大人一言增榮益譽以爲光華可乎余曰玉笈金箱之記翠媯元扈之冊固有識者所嗤鄙余切人不媚非所願也爾欲有言願聞其略婦乃舉其珍衛懿鏢者於朝夕佐餽之餘畢言於余余歎曰允若茲所謂式瞻清懿者矣乃撰次其言命兒子紹萊書之以獻焉維太夫人之歸我親家玉農都轉也年甫十有七家故素封食指解總總然太夫人處之裕如鉅細咸舉一門少長無閒言事其姑尤得其歡心歲在辛

卯都轉公舉於鄉旋選授河南中牟令太夫人主內政以儉助廉故都轉公循聲大起由邑令而秉牧鞭綰郡符又積功加鹽運使銜錫以孔翠之羽用飾其冠當是時羣盜如牛毛起於皖豫之間趨趨狁獠所至飄忽都轉公守河南郡力扼虎牢之險以爲藩籬方與賊相持於穀之嶽巖而郡中訛言寇且至左右請出城避之太夫人執不可傳太守教命門者毋出居民簡民之壯者諭以大義使助官兵登陴人心大定賊亦旋爲都轉公擊退是役也微太夫人有定力一舉足則城中不逞之徒且乘間起都轉公兵懸於外不能反顧伊雒之間

危矣其時鄂之被兵尤甚族人皆走中州太夫人咸厚
遇之若從子若從子婦若從子之子與婦資糧焉屢
焉兒童之禮褊婦女之齒結凡有所需罔弗具歷六年
之久無缺而太夫人之簪珥之衣帔盡付質庫矣及都
轉公歸道山太夫人家居益好施與親族待以舉火者
數家其幼稚不能成立者招至家或使之讀或使之學
賈於外歲庚午鄂大水維時率較歲所入穀不足以食
一歲太夫人曰塗有餓莩吾豈忍獨飽命諸子藉鄉里
之無食者計大小口而授之食賴全活者無算焉諸公
子守都轉公家學又稟承太夫人之教克自樹立後先

競爽讓村觀察蒞林太守萼樓方伯稚農比部金友玉
昆輝映於時所謂韋趙兄弟人之杞梓也雲嶠郡丞雖
早世然有子克家且抱孫矣萼樓官黔久有文武幹用
大府引重以公才公望期之太夫人於丙子之冬御安
輿陳檠戟浮南明之河而望銅鼓之山黔中士女羅拜
車下瞻望慈容塗歡而里忭今茲春日載陽風和氣暉
讓村諸君綵服爛鞠歷上壽有孫四人曾孫一人瑤
環瑜珥蘭茁其芽太夫人顧之而喜可知矣余忝在姻
家與聞德門盛事雖微子婦之請固將有以壽之易林
不云乎金齒鐵牙壽考宜家自茲以往讓村諸君名位

勛業隆隆日上太夫人由八九十以至期頤 天子
推恩錫類必有靈壽上尊之賜余更將載筆而紀其後
也

潘玉泉方伯六十壽序

天子在位之三年太歲在彊梧納漢其月曰涂其日庚
戌爲吳下玉泉方伯潘公六旬覽揆之辰公以名公之
子早歲通藉有位於朝嫻習政事通達政體當庚申辛
酉閒崎嶇戎馬攝贊機宜卒以耆定東南紆 朝廷南
顧之憂而造吳會無彊之福其勲名爛焉與李郭諸賢
比肩相次當茲六十曰耆扶杖於鄉碩德清望冠吳中

而動海內所謂人之杞梓國之楨幹也張子青制府歷
舉其生平行事爲文以壽之環璋運玆華藻雲飛洵文
章之冠冕述作之楷模矣而吳下諸君子以爲善言必
二更屬樾以一言進樾曰制府之言盡之矣又何言哉
無已請更舉其大者言之夫公之官雲司總秋典參處
法意小大以情劉孔才所謂法家之材司寇之任雖推
重一時未足見公之逸羣絕倫也其卓然關乎中興之
全局而大有造於三吳者則於咸豐之季得三事焉溯
自庚申蘇城之陷大江以南惟上海松江寶山奉賢南
匯川沙金山數城獨完而上海以撫藩所駐稱重鎮然

所募兵雖逾五萬皆市井無賴不習戰甚者與賊通而江浙間遺黎麇集於滬洋涇之上築室萬區商賈輻輳賊所覬覦非一日矣當是時曾文正公之師已克安慶其介弟沅浦中丞沿江東下次於蕪湖公乃與同人謀創迎師之議力言於中丞薛公團練大臣龐公馳書達皖遂以今大學士肅毅伯李公總統援滬之軍由輪船至滬其後由滬規復三吳實基此也其大有造者一也迎師之議甫定而賊大至防兵之在金山嘉定青浦者四五萬人一戰而潰於是滬人大聳而泰西人之在滬者觀望靡有定公又與同人謀謂非借助於彼則滬上

未可安枕卧也或曰如大體何公曰吐蕃回紇沙陀古人嘗用之不足爲病或又謂用之恐有後患公曰前年七月之役不已藉彼力乎至今年餘未見其患且患之有無不在借兵否也或又慮索費且無饜公請先與議定其費議者無以難於是會防局之設賊聞之退去及歲除烽火寂然皆公之力也其大有造者二也迨蘇城之旣復也降賊八人自部署其衆爲二十營分屯閘胥盤齊四門不受約束髮鬚如故合肥相國知其意叵測命八人者入見數以要挾之罪而誅之泰西之將曰戈登者助戰有功而得一城必大掠相國乃與之約

勿入蘇城其意固已恚矣至是以殺降將爲名謂背其
前所與議者移營崑山招降賊之子與同起居募廣勇
千人將助之復讐是時蘇城初克外患猝至則又大譁
公奉相國檄駕一葉之舟親至其軍戈登盛氣逆之降
賊之子在坐所持其父之頭血漉漉在側公告以賊情
責以大義搃天畫地辨論三日異謀遂寢欣然受賞而
歸使當日無公爲之排解事幾不可問矣此其大有造
者三也是三者皆有闕乎

中興之全局非煦煦
子子鄉里稱善者比今東南砥屬靜柝沈烽吳中士女
昌逸閭閻殷富甘食美服棚車鼓笛相與游敖嬉戲於

鷓坊鶴市之間夫孰知公之維持桑梓者如此其勤且
躋也公今年六十矣豪飲雄談仍如少壯有丈夫子四
人金友玉昆後先競爽女子子二人內外孫三十一人
晨夕問安都不能辨如郭汾陽頷之而已後福貞貞未
可限量天之報施固不虛也公方且飲然自下口不言
功知交中有欲以一觴爲壽者謹謝勿受惟賦水調歌
頭四章自述其懷有曰豪情壯采已隨風卷與雲氣其
志趣之高雅可知矣養之愈深發之愈大異日名位勛
業隆隆日上必將如子青制府所言切人不媚不敢彫
琢曼辭以瀆清聽謹舉其落落大者爲公誦之想吳下

諸君子亦必以樾爲善言德行也
其二 爲張子青前輩作

昔春秋於隱桓閒書家父凡伯又書任叔之子蓋皆大雅舊人聖經持筆書之見故家遺俗猶存也孟子亦稱故國不在喬木三代以下如漢之袁楊晉之王謝唐之崔盧皆以衣冠右姓軒冕相襲爲時所重 聖清襲九竅重九熬神合乎太乙維時蕭曹房杜之元臣並樹闕閔傅子孫鼎族高門代濟其美規筴榘彝式斯在非徒家乘之光榮乃 國脈所繇靈長運會所繇洪鬯者也之萬以丁酉拔貢丁未進士出吾師吳縣相國潘文

恭公之門因得與諸公子游接芬錯芳如萱逢杜其後奉 命撫蘇與玉泉方伯尤相習也方伯爲文恭公季子幼稟異資官太常博士積優成陟將外擢矣 特命以員外郎用懷香握蘭趨翔廊閣依光日月上應列星白雲之司古稱司憲 國家明刑弼教尤重其選

方伯由奉天司員外郎遷福建司郎中金行旣御循故事報囚遠邇疑獄平決攸歸實總厥成一時頌明允焉當咸豐之初大盜起於粵西趨趨玃蹀延易乎東南而金陵爲增巢窟穴三吳之民睽瞿奔觸不遑啓處方伯時讀禮家居受 詔以搏力句卒之法衛桑梓敵千勅

甲鴟然成軍先是當事者用漢代奔命舊制於材官騎士外選取精勇以赴急難而所募選皆東人素剽悍後又罷遣之益不靖翔於郊闕於廛攘於塗大爲閭里患方伯言於大府收捕之駢誅數百人遂以無事金陵既陷於賊民之流離失職者扶老攜幼望蘇臺而來歸若獸走壙方伯創議畱養城內外設厰十餘處衣之食之病者藥之物故者措之所全活者無算積前後功以道員用加鹽運使銜 錫孔翠之羽用飾其冠而方伯之有大造於東南爲 中興大局所繫者則尤在會防之役當庚申辛酉間蘇杭並陷江浙已土崩瓦解不可

收拾惟滬瀆一彈丸地僅存賊以數十萬衆攻之志在必得方伯從海道走京師力言於樞廷諸公請如唐用蕃將故事雖在風車火徼之民有棄逆助順者錄用無遺於是合中外爲一家遂有會防局之設合肥相國來撫三吳以方伯主局事其後由海上一隅規復東南旋乾轉坤基始於此蘇垣已復賊之有名號者雖已乞降跋扈如故乃禽殘翦猾以安反側而殊裔遐圻未達機要拘執小諒思發大難安危之端閒不容髮方伯奉合肥公之命親詣其軍指天畫地譬喻萬端遂使渙然冰釋自引而去雖魯仲連之排難解紛郭令公之單騎見

虜不是過也此方伯之有大造於東南而爲中興大局所繫者也夫舊家大族與國家同休共戚固與寒門素族有殊方伯以門資早歲通籍有位於朝故能嫻習故事通達治體才博智瞻方圓可施自曾文正公及合肥相國皆所器重深圖密慮咸與聞之卒以奠金湯而鞏磐石孟子所謂故國不在喬木有以哉嗣是厥後凡遣散降衆安集難民招徠商旅興修學校事無巨細方伯悉借箸謀之累以功加布政司銜紫泥之封視從一品而方伯澹於名利優游家術築養閒草堂卽以養閒自號日於其中摩挲金石評量花木一二知己之友

角巾野服時相往來飲酒賦詩以樂其志文恭公會集先賢語錄爲正學編方伯一一爲之疏解發明其義視宋范公偁之過庭錄項安世之項氏家說其紹聞衣德之意雖同而義蘊則過之粹然儒者之言也德配汪恭人本吳中望族其事親孝其相夫敬其教子嚴其御下寬持盈以約處泰而謙中外族黨無閒言諸子稟承家學金友玉昆後先競爽或以優行貢成均或食餼於庠皆列仕版膺清秩賦詩鳳池講經虎門容臺嚴重醞署清閒一時有李氏四桂之譽孫十有五人長者已青青其矜矣天倫之盛人爵之榮兩者並臻其極海內言高

門鼎貴者首屈一指焉之萬以養親久居吳下拙政園
與方伯過從甚密文酒讌游無月無之今歲十有二月
爲方伯六旬初度自爲水調歌頭六章高唱入雲蘇辛
避席其精神淵著可以想見異時 天子有人惟求舊
之思方伯名公之子無忝前脩書名 帝屏爲日久矣
必將受特達之知膺非常之遇封疆節鉞在指顧閒自
七八十以至期頤名位勳業如日之升視曩時之造福
鄉閭當有遠過之者請以斯言爲券也

春在堂禱文續編五

